


廿二史攷異

九







廿二史攷異

(九)

錢大昕撰

廿二史考異卷五十四

唐書十四

李泌傳

桀曰。我生不有命在天。此紂語。非桀語。

泌建言。學士加大。始中宗時。及張說爲之。固辭。乃以學士知院事。至崔圓復爲大學士。亦引泌爲讓而止。

王伯厚曰。崔圓相。肅宗在泌前。會要。貞元四年五月。泌奏張說懇辭大字。衆稱達禮。至德二年。崔圓爲相。加集賢大學士。因循成例。望削去大字。此乃泌引圓爲辭。傳誤矣。見困學紀聞予按百官志。修文館。景

龍二年。置大學士四人。修文館。即弘文館。即泌所謂學士加大。始中宗時也。志又云。集賢院。至德二年。置大學

士。貞元四年。罷大學士。又有崇元學。天寶二載。改曰崇賢館。置大學士二人。以宰相爲之。貞元四年。崇元館即崇賢館罷大學士。志所云。至德二年。正崔圓爲相之日。集賢有大學士自圓始。而宰相之領大學士。

不始於此。蓋自天寶初。立崇賢館。已有之矣。更沂而上之。則景龍初。修文館大學士李嶠。宗楚客。趙彥昭。韋嗣立四人。亦皆宰相也。但睿宗以後。大學士久已不除。開元時。張說以宰相領集賢院事。不敢居大學士之名。而六典亦無此職。其後李林甫。陳希烈輩。但兼崇元館大學士。而集賢仍無大名。至崔圓

始爲之。德宗貞元四年，因李泌之請，并集賢崇元，皆去大字。然考之新舊二史，如楊綰、常袞、裴度、牛僧孺、崔鉉、韋昭度、孔緯、杜讓能、徐彥若、崔垂休、獨孤損、裴樞、柳璨，皆加弘文館大學士。李勉、劉從一、裴玪、賈餗、崔郾、李德裕、馬植、鄭朗、崔慎由、蕭鄴、杜讓能、張濬、崔垂休、崔遠、裴贄、楊涉，皆加集賢殿大學士。綰、袞、從一，在泌入相以前，其餘諸人，皆在泌後，則是貞元罷大學士之後，未久而復置也。考權德輿於元和二年，作昭文館大學士壁記云：太宗文皇帝，始于弘文殿側，創弘文館，盛選重名。虞世南、褚亮而下爲之。學士更直，密侍于其中。其後徙于門下省。景龍初，始置大學士，名命益重，多以宰司處之。每二府爰立，則統於黃樞，而或署或否，不爲恆制。孝文後元二十年前，斯職闕焉。前年秋八月，今河中司空公居之。今年夏五月，相國蕭公居之。記所稱司空公者，杜黃裳也。蕭公，謂武元衡也。德宗諡曰孝文，記云闕職二十年者，卽謂貞元以後，學士削去大字也。以是推之，大學士復置，必在元和之初矣。大學士爲宰相加官，其罷而復置，宜見於百官志，而史家不能考而著之，疏略甚矣。宋初避諱，改弘文爲昭文。此德輿壁記，亦稱昭文，蓋宋時校書者追改。

苗晉卿傳

諷有司改諡文貞。唐會要：太常諡爲懿獻，及敕出，改諡文懿。

裴冕傳

有詔贈太尉。唐會要諡曰獻穆。

裴向傳

贈太子少保。唐會要諡曰穆。

崔光遠傳

代蕭華爲魏州節度使。按方鎮表是時無魏州節度。舊史肅宗紀但云魏州刺史。非節度也。唐會要

贈揚州大都督。諡曰威。

李麟傳

父濬。贈戶部尚書。諡曰誠。誠當作成。唐會要有贈戶部尚書真源縣子李璿。諡曰成。卽此人也。濬璿字

形相似。

楊綰傳

父溫玉。在武后時爲顯官。唐會要溫玉官岐王傅恆農縣公。諡曰忠。

崔植傳

終華州刺史。唐會要諡曰敬。

李承傳

幼孤。其兄曄養之。宰相世系表承在曄之前。似承兄而曄弟。當是表誤。

韋倫傳

父光乘。在開元天寶間。爲朔方節度使。唐會要光乘贈太子少傅。諡曰烈。

來瑱傳

明年。上文有乾元二年。則徙瑱山南東道、襄、鄧、均、房、金、商、隨、郢復十州節度使。按方鎮表至德二載升

襄陽防禦使爲山南東道節度使。領襄、鄧、隋、唐、安、均、房、金、商、九州。治襄州。此傳有郢復而無唐安。與表互異。又傳稱十州節度。今數之。止有九州。則史文當有脫誤。考下文呂諲、王仲昇等言。瑱得士心。不可。以畱。乃改山南東道、襄、鄧、唐、復、隋、郢六州節度。通鑿亦云。割商、金、均、房。別置觀察使。令瑱止領六州。以是推之。似唐州元在瑱所管十州之內。傳偶脫唐字耳。

嚴礪傳

贈司空。唐會要諡曰威。

李栖筠傳

李峴爲大夫。以三司按羣臣陷賊者。按呂諲傳亦稱御史大夫。李峴刑法志亦同。而峴傳不云爲御史大夫。蓋脫漏也。

李吉甫傳

德宗以來姑息藩鎮有終身不易地者吉甫爲相歲餘凡易三十六鎮殿最分明按吉甫以元和二年正月拜相明年九月出鎮其時魏博則田季安恆冀則王士真盧龍則劉濟淄青則李師道淮西則吳少誠滄景則程權易定則張茂昭汴宋則韓弘澤潞則盧從史陳許則劉昌裔河東則嚴綬鳳翔隴右則李鄴東川則嚴礪俱未徙節所更代者不過河中邠寧西川諸近鎮而已恐未必有三十六鎮之多傳文不足深信

有司諡曰敬憲度支郎中張仲方非之帝怒貶仲方更賜諡曰忠懿唐會要吉甫諡恭懿張仲方傳吉甫卒太常諡恭懿博士尉遲汾請諡敬憲俱不云忠懿

王思禮傳

諡曰武烈唐會要思禮諡兩見一云武一云武烈蓋傳聞異詞

曲環傳

贈司空唐會要贈司徒諡武烈

張孝忠傳

寶臣晚節稍忌刻殺大將李獻誠等舊史同

按藩鎮傳敘李寶臣殺骨鯁將辛忠義盧俶許崇俊張南容

張彭老等二十餘人不及獻誠。其下敍惟岳事。又載牙將衛常寧與獻誠語。則獻誠實未死也。此傳誤。

李巽傳

贈尚書右僕射。唐會要諡曰肅。

常袞傳

拜門下侍郎。同中書門下平章事。弘文崇文館大學士。按百官志。崇文館隸東宮。乾元初。以宰相爲學

士總館事。不云何年置大學士。亦脫漏也。

袞爲相。散官纔朝議而無封爵。郭子儀言於帝。遂加銀青光祿大夫。封河內郡公。百官志。朝議大夫從

五品下。銀青光祿大夫正四品上。

齊映傳

贈禮部尚書。諡曰忠。唐會要諡恭懿。

姜公輔傳

乃擢公輔諫議大夫。同中書門下平章事。按諫議大夫。是時纔正五品耳。諫議給事。皆門下省官。故得

以本官入相。其後罷爲太子左庶子。左右庶子。卻是正四品官。雖罷相。猶爲序遷也。

顏真卿傳

祕書監師古五世從孫。按真卿爲其父惟貞撰廟碑，敘世系最悉。真卿父惟貞，祖昭甫，曾祖勤禮，勤禮與師古並，思魯之子，則真卿乃師古之從曾孫也。

揚朝晟傳

十七年卒於屯。唐會要贈尙書右僕射，諡曰毅。

張建封傳

冊贈司徒。唐會要諡曰襄。

韓弘傳

滑州匡城人。按韓愈撰神道碑，以爲陳之太康人。

盧坦傳

贈禮部尙書。唐會要諡曰貞。

閻濟美傳

諡曰溫。唐會要濟美官太子少傅，諡曰良。

劉伯芻傳

贈工部尙書。唐會要諡曰敬。

潘孟陽傳

父炎。大麻末。官右庶子。進禮部侍郎。唐會要。贈右僕射。諡曰文。

崔龜從傳

遷太常博士。言九宮皆列星。不容爲大祠。詔可其議。九宮遂爲中祠。按舊書禮儀志。及舒元輿傳。太和二年。元輿爲監察御史。奏言九宮之神。於天地猶子男。陛下爲天子。反臣於天之子男。臣竊以爲過。合稱皇帝遣某官致祭。不宜稱臣與名。詔都省議。皆如元輿言。乃降爲中祠。然則九宮之議。實起于元輿。其時龜從爲太常博士。或在都省預議之列。故舊書本傳亦及之。然不應舍元輿而專歸功于龜從也。

韋夏卿傳

贈尙書左僕射。諡曰獻。唐會要。諡曰簡。

李遜傳

諡曰貞。唐會要。李遜。諡凡兩見。一云貞。一云恭肅。蓋傳聞異詞。

遜弟建。贈工部尙書。唐會要。諡曰元。

孔戮傳

戮子遵孺。遵孺子緯。宰相世系表。作溫孺。

穆贊傳

贈工部尙書。唐會要。諡曰敬。

崔邠傳

諡曰文簡。唐會要。諡曰宣簡。

柳玘傳

昭國里崔山南瑄子孫之盛。仕族罕比。山南曾祖母長孫夫人。年高無齒。祖母唐夫人。事姑孝。每旦櫛縱笄。拜階下。升堂乳姑。長孫不粒食者數年。一日病。言無以報吾婦。冀子孫皆得如婦孝。此事亦見崔珙傳。珙之兄也。

王彥威傳

諡曰靖。唐會要。諡曰憲。

鄭裔綽傳

遷給事中。楊漢公爲荆南節度使。坐貪沓貶祕書監。尋拜同州刺史。裔綽與鄭公輿封還制書。帝自卽位。諫臣規正無不納。至是有爲漢公地者。遂終不易。會賜宴禁中。天子擊毬至門下。官謂二人曰。近論漢公事類朋黨者。裔綽曰。同州太宗興王地。陛下爲人子孫。當慎所付。且漢公墨沒敗官。奈何以重地私

之帝變色翼日貶商州刺史。按裔綽官給事中。止正五品。出補商州刺史。乃從三品。唐制上州刺史

刺史正四品。商爲升品外除。乃謂之貶。漢公官祕書監。本從三品。轉國子祭酒。亦從三品。自祭酒除同

州刺史。仍從三品。同品而補外。乃謂之擢。漢公傳。稍遷國子祭酒。宣宗擢爲同州刺史。蓋同華兩州。京師近輔。刺史葉侍郎

兼禮部尙書。同平章事。集賢殿大學士。賜紫金魚袋。鄭朗。朝散大夫。守工部尙書。同平章事。集賢殿大

學士。賜紫金魚袋。蕭鄴。朝議大夫。守戶部侍郎。同平章事。判度支。賜紫金魚袋。劉瑑。皆見任宰相。中書

侍郎六部尙書。又皆三品職事官也。又如正義大夫。守御史大夫。賜紫金魚袋。崔鉉。朝散大夫。守京兆

尹。賜紫金魚袋。韋澳。皆見任三品職事官。昭義節度使。檢校禮部尙書。兼潞州大都督府長史。御史大

夫。賜紫金魚袋。鄭涓。邠寧節度使。檢校禮部尙書。邠州刺史。賜紫金魚袋。畢誠。夏綏銀宥節度使。通

議大夫。檢校左散騎常侍。夏州刺史。御史大夫。賜紫金魚袋。鄭助。邠寧節度使。朝議大夫。檢校工部尙

書。邠州刺史。賜紫金魚袋。柳憲。朔方節度使。朝散大夫。檢校左散騎常侍。靈州大都督府長史。賜紫金

魚袋。劉潼。山南西道節度使。中散大夫。檢校禮部尙書。興元尹。賜紫金魚袋。蔣係。朝議大夫。檢校禮部

尙書。兼太原尹。北都留守。賜紫金魚袋。劉瑑。皆見任方鎮檢校官。並至三品。而散官未到金紫銀青。則

非賜不得衣紫也。又如翰林學士。朝議郎。守尙書司勳郎中。知制誥。賜緋魚袋。孔溫裕。朝議郎。守中書

舍人。權知禮部貢舉。賜緋魚袋。李藩。皆五品職事官之清要者。而散官未到大夫。則非賜不得衣緋也。

牛叢以司勳員外郎爲睦州刺史。賜金紫。謝曰：「臣今衣刺史所假緋，卽賜紫爲越等，乃賜銀緋。叢與裔綽皆嘗任五品職事官，而散官未到五品，故須銀緋之賜。」

賈耽傳

滄州南皮人。按地理志：南皮隸景州。景州本滄州所分。耽仕於德順二宗之世。南皮猶隸滄州也。鄭餘慶撰神道碑云：清池人。

杜悰傳

權德輿爲相，其壻翰林學士獨孤郁以嫌自白。憲宗見郁文雅，歎曰：「德輿有壻乃爾。」此事又見郁傳。當刪此存彼。

始宣宗世，夔王以下五王處大明宮內院，而郾王居十六宅。帝大漸，樞密使王歸長、馬公儒等以遺詔立夔王，而左軍中尉王宗實等入殿中，以爲歸長等矯詔，乃迎郾王立之，是爲懿宗。此事已見懿宗紀。毋庸更入此傳。若云初懿宗之立，非宣宗意，及卽位久之，遣樞密使云云，則文省而意益明矣。

久之，遣樞密使楊慶詣中書獨揖悰，它宰相畢誠、杜審權、蔣仲不敢進，乃授悰中人請帝監國奏，因諭悰劾大臣名不在者抵罪。悰遽封授使者復命，謂慶曰：「上踐祚未久，君等秉權，以愛憎殺大臣，公等禍無日矣。」慶色沮去。帝怒亦釋。大臣遂安。按懿宗紀及宰相表，悰以咸通二年二月由尙書左僕射判度

支再入相。距懿宗踐祚之始。已兩年矣。使帝銜怒諸大臣。欲置之死地。當不俟此時。傳所云未可深信也。

令狐綯傳

監軍郗厚本。杜悰傳云。戍將郭厚本。

子瀉、渙、颯。宰相世系表。以颯爲定之孫。誤。

裴延齡傳

死年六十九。人語以相安。唯帝悼不已。冊贈太子太傅。上柱國。按舊書延齡傳。延齡死。中外相賀。唯德宗悼惜不已。新史改云。人語以相安。詞意殊難解矣。舊史云。贈太子少保。此云太子太傅。未知孰是。上柱國。勳視正二品。然唐時勳級最濫。庶僚軍校。授上柱國者甚多。杜佑云。魏置柱國。當時貴寵第一。國家以爲勳級。纔得地三十頃耳。延齡贈上柱國。未爲異數。它傳亦未有載勳官者。此所謂不必書而書也。

韋渠牟傳

贈刑部尙書。諡曰忠。唐會要。諡曰隱。

李齊運傳

蔣王惲孫。案宰相世系表乃惲之曾孫。

劉禹錫傳

宰相裴度兼集賢殿大學士。按度本傳進弘文館大學士在平蔡之後。此兼集賢殿大學士當在文宗大和初。本傳不載者略之也。

叔文北海人。自言猛之後。按叔文傳云越州山陰人。此云北海者舉其族望也。

柳宗元傳

從曾祖奭爲中書令。得罪武后死高宗時。按列傳第三十七卷柳澤傳末已附出奭事。此復承宗元墓志之文書之。吳縝所謂宜削而反存也。

廿二史考異卷五十五

唐書十五

裴瑁傳

建言集賢院官登朝。自五品上爲學士。下爲直學士。餘皆校理。史館以登朝者爲修撰。否者直史館。以準六典。遂著于令。今考元和以後。入史館及集賢弘文兩院者。如韓愈。以比部郎中史館修撰。蔣伸。以右補闕史館修撰。蔣偕。以右拾遺史館修撰。鄭澣。以國子博士史館修撰。王溥。以禮部員外郎史館修撰。令狐滈。以右拾遺史館修撰。王龜。以祠部郎中史館修撰。韋澳。以考功員外郎史館修撰。牛蔚。以吏部郎中史館修撰。楊漢公。以戶部郎中史館修撰。李翱。以國子博士史館修撰。楊虞卿。以禮部員外郎史館修撰。高釳。以右補闕史館修撰。盧知猷。以工部侍郎史館修撰。陳夷行。以起居郎史館修撰。裴坦。以左拾遺史館修撰。獨孤郁。以右拾遺兼史館修撰。遷考功員外郎。仍兼史館修撰。路隋。以左補闕史館修撰。薛廷玉。以右拾遺史館修撰。杜顥。以咸陽尉直史館。沈傳師。以鄆尉直史館。轉左拾遺補闕。史館修撰。蔣係。以昭應尉直史館。拜左拾遺史館修撰。此修撰與直館之別也。李益。以祕書少監爲集賢殿學士。馮宿。以左散騎常侍兼集賢殿學士。孔敏行。以司勳郎中爲集賢殿學士。牛僧孺。以考功員外

郎爲集賢學士。王鐸以右補闕爲集賢殿直學士。王起以殿中侍御史兼集賢殿直學士。周墀以監察御史爲集賢殿學士。疑脫直字孔緯以禮部員外郎兼集賢直學士。白居易以蓋匡尉爲集賢校理。段文昌以登封尉爲集賢校理。杜讓能以長安尉爲集賢校理。李福以藍田尉爲集賢校理。令狐滈以長安尉爲集賢校理。石洪以昭應尉爲集賢校理。楊收以渭南尉爲集賢校理。馮定以鄆尉爲集賢校理。丁公著以太子文學兼集賢校理。擢右補闕遷直學士。此學士直學士與校理之別也。王彥威以司封郎中爲弘文館學士。柳公權以左司郎中爲弘文館學士。楊虞卿以右司郎中爲弘文館學士。令狐定以駕部郎中爲弘文館直學士。疑衍直字鄭裔綽以渭南尉直弘文館。薛逢以萬年尉直弘文館。裴樞以藍田尉直弘文館。柳珪以藍田尉直弘文館。孔緯以長安尉直弘文館。此學士與直館之別也。至如于休烈以起居郎爲集賢殿學士。歸崇敬以贊善大夫史館修撰兼集賢校理。張薦以史館修撰兼陽翟尉。乃在未定制以前。故不盡依資品矣。楊嗣復官右拾遺。當充史館修撰。而傳云直史館。疑修史者不通官制。以意改竄故耳。唐時稱登朝官者。史未有明文。考百官志。文官五品以上。及兩省供奉官。監察御史。員外郎。太常博士。日參。號常參官。其餘職事。九品以上官。但朝朔望而已。常參官。卽裴垍所謂登朝官也。宋制。侍從卿監正郎員外郎而下。以正言。卽唐之拾遺太常博士。國子博士。太常丞。祕書丞。殿中丞。太子中允。贊善大夫。中舍洗馬。爲升朝官。著作佐郎。大理光祿衛尉。將作丞。大理評事。太常寺太祝。奉禮郎。祕

書省校書郎。正字。將作監主簿。爲京官。略與唐制。

高固傳

贈陝州大都督。唐會要。諡曰恭。

李光進傳

元和四年。王承宗。范希朝。引師救易定。按是歲王承宗反。以騎二萬逾木刀溝。河東節度使范希朝。與易定。節度張茂昭。合兵擊敗之。此承宗下當有脫文。

石洪傳

石洪者。字濬川。按洪官止縣尉。無卓絕之行。於烏重裔傳。一見其姓名足矣。乃復據韓退之所撰墓志。別爲附傳。首尾百一十四言。諛墓之文。史家豈能悉書乎。

李逢吉傳

父顏。有鋼疾。逢吉自料醫劑。遂通方書。按宰相世系表。逢吉父名歸期。顏則逢吉之大父也。

裴度。與元稹。知政。度嘗條稹儉佞。逢吉以爲其隙。易乘。遂并中之。遣人上變言。和王傅于方。結客欲爲稹刺。度。帝命尙書左僕射韓皋。給事中鄭覃。與逢吉參鞫。方無狀。稹度坐是皆罷。此事又見元微之。于頔傳。方爲和王傅。當見於頔傳。而翻不書。此史之疏也。頔傳云。事下有司。驗無狀。方坐誅。竊意方刺度。

事卽無狀。何至遽羅重法。且元李兩傳。俱不云方坐誅死。疑方特坐罪。非坐誅也。

牛僧孺傳

敬宗立。僧孺數表去位。帝爲於鄂州置武昌軍。授武昌節度使。同平章事。按宰相表。僧孺罷相。出鎮武昌。在寶曆元年正月。今以方鎮表考之。憲宗元和元年。升鄂岳觀察使爲武昌軍節度使。五年。罷武昌軍節度。置鄂岳都團練觀察使。中更穆宗。敬宗。文宗。武宗四朝。俱無改易。直至宣宗大中元年。始有復置武昌軍之文。蓋方鎮表。失載敬宗初復置一事矣。僧孺鎮武昌凡五年。復入相。而杜元穎。元微之。相繼爲武昌軍節度使。微之卒。而崔郾爲鄂岳安黃觀察使。不稱節度。是武昌節鎮之罷。在太和五年也。諡曰文簡。唐會要。諡文貞。

竇羣傳

時翮爲華州刺史。父子同拜。世以爲寵。上文不云父翮。則父子同拜之語無根。

宗閔弟宗冉。按宰相世系表。宗冉乃宗閔之兄。

楊嗣復傳

武宗之立。非宰相意中人。多言嗣復。珏不利于陛下。帝剛急。卽詔中使分道誅嗣復等。德裕與崔郾。崔珙等。詣延英言故事。大臣非惡狀明白。未有誅死者。昔太宗。玄宗。德宗三帝。皆嘗用重刑。後無不悔。願徐

思其宜使天下知盛德有所容不欲人以爲冤。此語已見李德裕傳此但當云德裕等詣延英極諫不必更舉其詞也。

李宗閔傳

京兆金城人。舊史云扶風平陵人。

張又新傳

又新與拾遺李續、劉栖楚等爲逢吉搏吠所憎。故有入關十六子之目。此事又見李逢吉傳。宜存彼去此。且又新以諂附見譏。其事迹散見於李逢吉、李紳諸篇。其歷官本末。自可附於父薦傳。何必別立傳乎。

楊虞卿傳

子知退。知權、壇、堪、漢公皆擢進士第。漢公最顯。按此似漢公亦虞卿子。而上云虞卿兄弟漢公、汝士爲人所奔向。宰相世系表亦以汝士爲虞卿兄。漢公爲虞卿弟。則此文皆字未安。

錢徽傳

贈尙書右僕射。唐會要諡曰貞。

高鉅傳

節以錯爲禮部侍郎。閱三歲。頗得才實。始歲取四十人。才益少。詔減十人。洪邁容齋續筆云。按登科記。開成元年。中書門下奏進士元額二十五人。請加至四十人。奉敕依奏。是年及二年三年。錯在禮部。每舉所放各四十人。至四年。始令每年放三十人爲定。則唐書所云誤矣。大昕按。舊史本傳。本云錯掌貢舉三年。每歲登第者四十人。及三年榜出之後。乃有敕改每年限放三十人。非謂錯所放減十人也。新史刪改文章不明。致來容齋之誚。

盧簡辭傳

兄簡能。見鄭注傳。按鄭注傳末。附載錢可復。盧簡能。蕭傑。盧弘茂。魏弘節。李敬彝諸人。錢徽傳稱。子可復。死。鄭注時。不云見注傳。義例已不一。蕭傑。俛之弟。則俛傳并不一見其名。

高元裕傳

子璩。以左拾遺爲翰林學士。擢諫議大夫。近世學士。超省郎進官者。爲鄭顥以尙主。而璩以寵升云。顯傳。不云爲學士。史之略也。拾遺官從八品上。諫議大夫。則正四品下。計超七階。

敬晦傳

祖括。拜御史大夫。大麻中卒。唐會要。括贈太子太傅。諡曰獻。

陳夷行傳

帝嘗怪天寶政事不善。問姚元崇、宋璟於時在否。李珣曰：姚亡而宋罷。按宋璟以開元二十五年卒。不逮天寶時。珣所對未審。

前日鄭餘慶著僕射上儀。謂隔品官無亢禮。時竇易直任御史中丞。議不可及。易直自爲僕射。乃忘前議。當時鄙厭之。此事又見易直傳。

李讓夷傳

辟鎮國李絳府判官。李絳時爲華州刺史。華州嘗置鎮國軍。故辟讓夷爲判官也。劉瑒傳：鎮國陳夷行表爲判官。夷行亦華州刺史也。

李珣傳

貶江西觀察使。按舊史及通鑑。珣貶桂管觀察使。非江西觀察。宣宗立。內徙郴舒二州刺史。按風洞題名。會昌五年五月。珣已稱郴州刺史。則珣之徙郴。在宣宗卽位以前。郴亦邊州。未可云內徙。當是宣宗初由郴徙舒耳。

劉瑒傳

遷刑部侍郎。乃哀彙敕令可用者。由武德訖大中。凡二千八百六十五事。類而析之。參訂重輕。號大中刑律總類以聞。按刑法志。宣宗時。左衛率府倉曹參軍張戣。以刑律分類爲門。而附以格敕。爲大中刑

律統類。詔刑部頒行之。不云瑒所撰。又考藝文志。大中刑法總要格後敕六十卷。刑部侍郎劉瑒等纂。與張戣所撰大中刑律總類十二卷。各爲一書。疑瑒傳誤。

盧光啓傳

初。光啓執政。韋貽範。蘇檢。相繼爲宰相。帝還京師。檢長流環州。光啓賜死。按昭宗紀。天復三年正月。至自鳳翔。二月。朱全忠殺蘇檢。吏部侍郎盧光啓。宰相表亦稱檢爲全忠所書傳不書檢之死。亦闕漏也。

馬植傳

因著令三館學士。不避行臺。自植始。三館者。集賢殿。弘文館。史館也。王明清揮塵前錄云。唐文皇聚一時名流于冊府。始有十八學士之號。後來凡居館殿者。皆稱之。吳曾能改齋漫錄云。唐集賢院記。開元故事。校書官許稱學士。故筆談云。今三館職事。皆稱學士。用開元故事也。楊收以集賢校理而稱學士。蓋以此。

路巖傳

韋保衡弟保乂。自兵部侍郎。貶賓州司戶參軍。按唐承旨學士壁記。咸通十二年二月。韋保乂自戶部員外郎守本官。充翰林學士。五月。加戶部郎中。依前充。十四年十月。貶賓州司戶。是保乂未嘗爲兵部侍郎。且唐季以翰苑爲要地。傳不書學士。亦失之。

盧攜傳

累進戶部侍郎翰林學士承旨。乾符五年進同中書門下平章事。俄拜中書侍郎、刑部尚書。按宰相表攜以乾符元年十月拜相。舊唐宗紀十一月爲中書侍郎。二年六月兼工部尚書。四年正月兼刑部尚書。傳系之五年誤也。舊史本傳謂乾符初以諫議大夫召充翰林學士。拜中書舍人。乾符末加戶部侍郎。學士承旨。四年以本官平章事。其書入相差一年。且乾符紀元終於六年。既書乾符末矣。而其下乃書四年。其躐謬較之新傳尤甚也。

與畋爭相恨詈。由是罷爲太子賓客。按僖宗紀及宰相表。鄭畋與攜之罷。在五年十月。則前稱乾符五年者。殆誤以罷相之年爲入相之年矣。鄭畋傳以兩相俱罷。系於乾符六年。又與紀表互異。

王徽傳

昭義高潯與賊戰石橋。敗績。其將劉廣擅還據潞州。別將孟方立殺廣。因取邢洺磁三州。貳於已。昭義所隸。唯澤一州。按僖宗紀。中和元年八月。昭義軍節度使高潯及黃巢戰於石橋。敗績。十將成麟殺潯。入於潞州。九月。昭義軍戍將孟方立殺成麟。自稱留後。孟方立傳。昭義節度使高鄴與潯同擊黃巢。戰石橋。不勝。保華州。爲裨將成鄰與麟同所殺。還據潞州。衆怒。方立率兵攻鄰。斬之。自稱留後。獨此傳云。方立殺劉廣。疑誤也。以通鑑證之。昭義大將劉廣。逐節度使高湜。自爲留後。在乾符二年。昭義十將成麟。殺

高潯還據潞州。在中和元年。前後本是兩事。

譜言其先本魏諸公子。秦滅魏。至漢徙關中霸陵。以其故王家爲王氏。十世祖熊。仕周爲同州刺史。此文與宰相世系表略同。當刪此存彼。

周寶傳

祖光濟。事平盧節度希逸。希逸上脫侯字。

餘杭鎮使陳晟。僖宗紀作清平鎮使。

不淹月而駢爲畢師鐸所囚。按僖宗紀。光啓三年九月。秦彥殺高駢。十月。錢鏐殺周寶。是高駢死在周寶之前。此傳謂寶死未淹月。而駢爲畢師鐸所囚。與紀自相矛盾。

劉巨容傳

諸將欲乘勝追斬巢。巨容止曰。朝家多負人。有危難不愛惜官賞。事平卽忘之。不如留賊爲富貴作地。諸將謂然。故巢復熾。此語又見黃巢傳。

楊守亮傳

守信興平軍節度使。興平節度卽方鎮表所謂金商節度也。舊本紀云守宗。此云守信。名略異。

初。朱玫取興鳳州虢州。刺史滿存以兵赴行在。復收二州。昭宗紀。光啓二年九月。靜難軍將王行瑜陷

興鳳二州十月神策行營先鋒使滿存克興鳳二州行瑜朱玫部將也紀傳書滿存官銜各異蓋一人兼此兩職。

王重榮傳

與兄重盈俱以毅武冠軍。僖宗紀光啓三年護國將軍常行儒殺其節度使王重榮其兄重盈自稱留後。舊紀同惟五代史王珙傳以重盈爲重榮之弟。

克用遣子存貞請天子還宮存貞當作存勛。

李罕之傳

抵鉢襖祇枝去。廣韻祇枝尼法衣也。

王敬武傳

師範遣部將盧宏攻之。五代史劉鄩傳作盧洪蓋宋人避諱改之。

孟方立傳

以遷爲汾州刺史。光化二年克用復表遷爲昭義節度使。天復元年朱全忠遣氏叔琮攻河東遷以潞州迎降且爲鄉道師還全忠以丁會代遷入朝爲全忠所殺此皆宜見於本傳者。

楊行密傳

詔朱瑾爲盧平節度使。繇海道取青齊。馮宏鐸爲感化節度使。出漣水攻徐宿。此行密承制遙授。不惟不能有其地。亦並未出師。故瑾、宏鐸傳俱不載。

朱宣傳

宣亡命青州。爲王敬武牙軍。黃巢之亂。敬武遣將曹存實。率兵西入關。而宣爲軍候道。鄆州。是時節度使薛崇。拒王仙芝戰死。其將崔君裕攝州事。存實揣知兵寡。襲殺之。據其地。自稱留後。宣以功署濮州刺史。按僖宗紀。中和二年九月。平盧軍將王敬武。逐其節度使安師儒。自稱留後。是歲歲在壬寅。敬武始得青州。而王仙芝之伏誅。在乾符五年戊戌。先壬寅四年則敬武尙爲偏裨。不得有遣將之事。五代史宣傳云。宣事青州節度使王敬武爲軍校。隸其將曹全晟。中和二年。敬武遣全晟入關。與破黃巢。還過鄆州。鄆州節度使薛宗卒。其將崔君預。自稱留後。全晟攻殺君預。遂據鄆州。宣以戰功爲鄆州馬步軍都指揮使。與此傳略同。薛宗即薛崇君預。薛宗即薛崇君預。薛宗即薛崇君預。薛宗即薛崇君預。惟此云曹存實。而彼云全晟。姓同名異。據僖宗紀。乾符六年。淄州刺史曹全晟。晟音最。同音最。克鄆州。中和三年。天平軍將曹存實克鄆州。則全晟與存實。自是兩人。通鑑。中和元年十月。天平軍節度使南面招討使曹全晟。與賊戰。死軍中。立其兒子存實爲留後。二年五月。以天平留後曹存實爲節度使。則存實爲全晟兒子。此言當可信也。朱宣本平盧軍校。其從征黃巢。適隸曹全晟麾下。因留鄆州。全晟死。復事存實。與王敬武初無預。而史家以全晟爲敬武所遣。蓋失之矣。紀又

稱乾符四年黃巢陷鄆沂二州。天平軍節度使薛崇死之。五年天平軍節度使張揚卒。牙將崔君裕自知州事。六年淄州刺史曹全鼐克鄆州。殺崔君裕。是薛崇之後。尙有張揚一人。君裕所代者。乃張揚非薛崇。而殺君裕而代之者。亦全鼐非存實。與傳所書益相矛盾。考舊史僖宗紀。乾符二年七月。以京兆尹張揚檢校戶部尙書。充天平軍節度使。四年。冤句賊黃巢攻鄆州。陷之。逐節度使薛崇。張揚傳則云。乾符三年。出爲華州刺史。其冬檢校吏部尙書鄆州刺史。天平軍節度觀察等使。四年卒於鎮。紀傳書揚出鎮之年。雖互異。要之揚鎮天平。必在薛崇之前明矣。新紀書張揚於薛崇後。蓋不足信。而君裕實爲全鼐所殺。則紀是而傳非也。紀於中和二年十月。書韓簡寇鄆州。天平軍節度使曹全鼐死之。部將崔用自稱留後。三年。書天平軍將曹存實克鄆州。四年。書濮州刺史朱宣逐天平軍節度曹存實。自稱留後。此三條尤爲疏謬。蓋中和二年。與韓簡戰而死者。存實非全鼐也。全鼐死於賊。不死於韓簡。全鼐死而兄子存實代之。初無崔用其人者。與之爭立也。及存實爲韓簡所殺。而朱宣守鄆州。簡攻之不下。朝廷乃以旌節授之。又安得有逐存實之事乎。如紀所書。自乾符四年至中和四年。此八年中。天平節度有薛崇、張揚、崔君裕、曹全鼐、崔用、曹存實、朱宣。凡七人。據宣傳。則惟崇、君裕、存實。及宣四人。吳氏糾謬。雖譏其失。亦疑而未決。予以新舊史紀傳。五代史通鑑。參互考之。乃知張揚鎮鄆。在薛崇之前。崔君裕與崔用本一人。而紀誤分爲二。全鼐與存實本二人。而傳誤溷爲一。其實自乾符四年以後。鄆帥祇

薛崇、崔君裕、曹全晟、曹存實、併宣爲五人也。唐末諸帝無實錄。史家得於傳聞，言人人殊，無從質其然否。聊述愚管，以俟後賢論定之。

趙彘傳

中和五年擢彰義軍節度使。按中和五年，卽光啓元年也。以三月改元，彘除節度。蓋在三月以前矣。唐時有兩彰義軍。蔡州之彰義，其時已改名奉國軍。涇州之彰義，則其時尚未置也。此傳所云彰義軍，方鎮表無之。推檢其故，蓋因秦宗權據蔡州以叛，故改奉國軍，復爲彰義軍，以彘遙領節度也。

龍紀初，進同中書門下平章事，忠武軍節度，仍治陳州。是時秦宗權伏誅，蔡州復爲奉國軍，以郭璠知留後事。因移忠武軍額於陳州，除彘爲節度，方鎮表當於是年書忠武節度，徙治陳州，而今本無之。蓋傳寫漏落也。趙氏兄弟父子相繼爲節度，幾二十年。至天復元年，乃以韓建代之。建本許州人，由是忠武軍又移於許矣。

劉建鋒傳

又攻容管，執寧遠節度使龐巨曦。按五代史，南漢世家，劉龔與馬殷爭容桂，殷取桂管，虜劉士政，龔取容管，逐龐巨昭，則殷未能得容管，亦無執巨昭事也。巨昭與巨曦，疑卽一人。

杜洪傳

爲里俳兒。俳兒卽伶人也。五代史鍾傳傳云江夏伶人杜洪。僖宗卽拜本軍節度使。昭宗時累加檢校太師中書令。見舊本紀。此傳失書。

鍾傳傳

使弟存昌據信州。傳宗紀作仔昌。存卽仔之譌昌。音相同也。

王潮傳

建汀二州。皆舉籍聽命。昭宗紀建州刺史徐歸範汀州刺史鍾全慕叛。附於王潮。

劉知謙傳

兼賀水鎮使。五代史世家云賀江鎮遏使。

天祐初始詔隱權節度留後。乃遣使者入朝。重賂朱全忠以自固。是歲盧光稠死。子延昌自稱刺史。爲其

下所殺。更推李圖五代史作李彥圖總州事。按五代史南漢世家徐彥若卒。軍中推隱爲留後。據昭宗紀在天復元年。

天祐二年拜隱節度使。此傳云天祐初詔權節度留後者。誤也。昭宗紀天祐元年虔州刺史盧光稠卒。

衙將李圖自稱知州事。與此傳云天祐初者相合。然卻非劉隱權留後之歲。亦爲矛盾。又考五代史盧

光稠傳。其卒在梁開平五年。譚全播立其子延昌事之。延昌見殺。其將黎求自立。求死而李彥圖始立。

則唐史紀傳所書皆不足據矣。二史皆出於歐陽永叔。而自相刺謬如此。

廿二史考異卷五十六

唐書十六

忠義傳一

有詔差爲二等。增至百八十七人。此功臣百八十七人。史無專傳者。劉正臣、見劉悟傳任雅相、見陸敦信相表

見宰相表趙仁本、見趙憬傳王德真、見宰相表安興貴、見李軌傳安修仁、同上杜君綽、鄭仁恭、見高宗紀獨孤彥雲、牛進

達、見太宗紀周護、沈叔安、翟無言、見武后紀趙承恩、同上裴思諒、見中宗紀楊執一、見楊執柔傳薛思行、見武后紀薛崇簡、見太平公主傳

李延昌、馮道力、崔諤之、見崔知溫傳許輔乾、薛景仙、見肅宗紀尙衡、同上凡二十五人。

荊州都督懷寧郡公杜君綽。唐會要。諡曰襄。今醴泉縣有君綽碑。

代州都督同安郡公鄭仁恭。高宗紀。唐會要。皆作仁泰。

潭州都督吳興郡公沈叔安。唐會要。贈荊州大都督。諡曰定。

忠義傳三

黃碣。爲漳州刺史。徙婺州。治有績。劉漢宏遣兵攻之。兵寡不可守。棄州去。按僖宗紀。中和四年。婺州

將王鎮執其刺史黃碣叛。附于董昌。此傳云棄去。則碣未嘗被執也。

孝友傳

李知本。開元中。孫瑱爲給事揚州刺史。唐會要有贈魯郡都督趙郡公李瑱。諡曰孝。豈卽其人乎。

隱逸傳

賀知章。越州永興人。按舊史。知章爲太子洗馬。德仁之族孫。德仁名在文苑傳。似可合爲一篇。

陸龜蒙。光化中。韋莊表龜蒙及孟郊等十人。皆贈右補闕。按唐摭言載。韋莊奏請追贈不及第人。近代者。孟郊、李賀、皇甫松、李羣玉、陸龜蒙、趙光遠、李甘、溫庭皓、劉德仁、陸逵、傅錫、平曾、賈島、劉稚珪、顧邵孫、沈珮、顧蒙、羅鄰、方干、凡十九人。

循吏傳

韋丹。封咸陽郡公。咸陽當作武陽。

韋宙。宙在嶺南。以從女妻小校劉謙。或諫止之。宙曰。吾子孫或當依之。謙後以功爲封州刺史。生二子。卽隱、夔。此事又見劉知謙傳。本名知謙。而云謙者。疑後人避漢祖諱去之。

儒學傳一

文宗定五經鑿之石。張參等是正訛文。參。代宗時人。非文宗時。

陸德明。子敦信。終大司成。唐會要。贈原州都督。諡曰康。

谷那律。孫倚相。仕爲祕書省正字。文藝傳富嘉謨。吳少微。谷倚稱北京三傑。卽此人也。
蕭德言。諡曰博。唐會要。諡曰密。

儒學傳二

路敬淳。唐初姓譜學。唯敬淳名家。其後柳沖、韋述、蕭穎士、孔至各有撰次。此語又見柳沖、孔至傳。
柳沖。李守素亦明姓氏。時謂肉譜者。肉譜語。又見守素傳。談調之詞。何必數見乎。
應劭有氏族一篇。按應氏風俗通義。本有氏族篇。廣韻亦屢引之。今本無此篇。蓋非完書。

儒學傳三

元行沖。少孤。養於外祖司農卿韋機。疑卽宏機。避諱省上一字。

陸堅。有詔起復。遣中官敦諭不就。有詔之上。當有親喪字。

鄭欽說。初。梁太常任昉。大同四年七月。於鍾山壙中得銘。按梁書。昉卒於天監七年。年四十有九。若

大同四年。歲在戊午。在天監戊子後三十年。此小說家無稽之說。而史家采之。可謂不學矣。

陳京。司馬晉以高皇太皇征西四府君爲別廟。按晉初追尊宣帝以上四親。所謂征西、豫章、潁川、京

兆四府君也。曷嘗有高皇太皇之稱乎。詳其文義。則司馬晉之上。當有曹魏二字。魏明帝嘗追尊武帝
父嵩爲太皇帝。祖騰爲高皇帝也。魏以武帝爲太祖。而高皇太皇在別廟。晉以宣帝爲太祖。而征西四

府君在別廟，正同一例。

若世祖，則春秋所謂陳於太祖者。按春秋無此文。舊禮儀志載此議。本云代祖即世祖神主，則太祖已下

毀廟之主。公羊傳所謂已毀廟之主。陳於太祖者是也。詞意甚明白。新史所不逮也。

故有連王廟之制。王廟當作五廟，下文同。

文藝傳一

袁朗。典籤蘇幹。按蘇幹傳云：父勛，武德中爲秦王諮議典籤、文學館學士。又褚亮傳載秦府十八學

士，亦有蘇勛而無蘇幹，則幹乃勛字之譌。

王勃。卒年二十九。楊盈川撰勃文集序云：春秋二十有八，卒於上元三年八月。

文藝傳二

李白。年六十餘。按曾鞏撰次白詩集序云：白卒年六十有四。

蕭穎士。殷寅者，陳郡人。寅卽踐猷之子，已見儒學傳。

文藝傳三

李賀。卒年二十七。此據杜牧所撰詩集序也。李商隱爲賀小傳，則云生二十四年。

吳武陵。信州人。按李紳傳：始澧人吳汝納者，韶州刺史武陵兄子也。汝納旣爲武陵兄子，而一稱信

州人。一稱禮人。疑有一誤。

李商隱。或言英國公世勣之裔孫。馮養吾曰。義山詩云。我系本王孫。又云我家在山西。山西卽隴西也。蓋亦涼武昭王之後。非世勣裔也。

方技傳

張憬藏。

當作庭。

當國。憬藏以紙大署台字投之。光廷曰。吾旣台司矣。尙何事。後三日。貶台州刺史。

按光庭以開元十七年六月入相。二十一年三月薨。初無貶斥之事。後讀劉賓客嘉話錄云。中書令河東公開元中居相位。有張憬藏者。能言休咎。一日忽詣公。以一幅紙大書台字授公。公曰。余見居台司。此意何也。後數日。貶台州長史。李綽尙書故實亦具載斯事。兩書所稱河東公者。張嘉貞也。新史乃以裴光庭當之。謬之甚矣。考嘉貞由中書令。罷爲鹵州刺史。其後雖貶台州。去作相之日久矣。小說家附會之說。不盡足信。

帥夜光。因九仙公主得召見。公主傳未見有封九仙者。

列女傳

高愍女。父彥昭。贈陝州都督。唐會要。贈工部尙書。諡曰愍。

外戚傳

武士讓之孫攸寧爲建昌王攸歸九江王攸望會稽王士逸孫懿宗河內王嗣宗臨川王仁範河間王仁範子載德潁川王士稜孫攸暨千乘王惟良子攸宜建安王攸緒安平王從子攸止恆安王重規高平王今按宰相世系表攸暨與攸寧皆懷道之子與攸歸攸止攸望同爲士讓之孫而傳獨以攸暨爲士稜孫其可疑一也表以仁範爲士逸子重規與載德均爲仁範之子傳則以仁範爲士逸孫以重規爲惟良從子其可疑二也據表惟良與懷運皆士讓之子則攸宜攸緒等亦士讓孫矣傳不應別而言之若以惟良名已見傳故別敍惟良之子則懷運名亦見傳而攸歸等何以不云懷運之子其可疑三也據表攸歸攸止攸望皆懷運子傳或稱士讓孫或稱惟良從子似非同父昆弟其可疑四也文苑英華載宋之間爲武攸暨請降王位表稱臣亡兄攸寧屬纊之夕再受懇言憂臣愚蒙令臣退讓乃知攸寧攸暨實親昆弟攸寧又爲攸暨之兄傳以攸暨爲士稜孫固誤表列攸暨於攸寧之前亦非也

宦者傳

唐制內侍省官有內侍四內常侍六內謁者監內給事各十謁者十二典引十八寺伯寺人各六又有五局一曰掖廷主宮嬪簿最二曰宮闈扈門闌三曰奚官治宮中疾病死喪四曰內僕主供帳鐙燭五曰內府主中藏給納局有令有丞皆宦者爲之內侍省官已見百官志此重出可刪

李輔國以右武衛大將軍藥子昂代判元帥行軍司馬唐會要子昂贈揚州大都督諡曰忠

酷吏傳

崔器、三日卒。唐會要諡曰貞。

藩鎮魏博傳

田承嗣。加同中書門下平章事。封雁門郡。寵其軍曰天雄。按舊書承嗣傳。無寵其軍曰天雄之文。方鎮表亦不載。至天祐元年。始云賜魏博節度。號天雄軍節度。然則昭宗以後。乃有天雄軍號。謂田承嗣時已有之者。非也。舊書羅紹威傳。稱文德初。充天雄軍節度副使。文德紀元在天祐之前。恐亦追稱之。田悅。建中二年。鎮州李惟岳。淄青李納。求襲節度。不許。悅爲請。不答。遂合謀同叛。按李惟岳傳。寶臣死軍中。推爲留後。求襲父位。帝不許。田悅爲請。不聽。遂與悅。李正己謀拒命。又李正己傳。建中初。聞城汴州。乃約田悅。梁崇義。李惟岳偕叛。是李正己未死之前。已與悅偕叛。非因子納求襲鎮。不許而始叛也。考德宗紀。田悅反。在建中二年正月。李正己卒。其子納自稱留後。在是年八月。以是推之。悅未叛以前。但爲惟岳請襲。未嘗爲納請明矣。

藩鎮盧龍傳

李載義。太和四年。爲兵馬使楊志誠所逐。按文宗紀。在太和五年正月。舊紀傳亦作五年。此誤。

藩鎮澤潞傳

劉悟。卒贈太尉。唐會要諡襄武。

突厥傳

右賢王阿史那泥孰蘇尼失子也。始歸國。妻以宗女。賜名忠。上文云阿史那忠爲左賢王。阿史那泥孰爲右賢王。則忠與泥孰非一人矣。此乃云泥孰賜名忠。何其相矛盾也。

吐蕃傳

天寶元年。隴右節度使皇甫惟明。破虜大嶺軍。戰青海。破莽布支。斬首三萬級。明年。破洪濟城。戰石堡。不克。副將諸葛誦死之。按玄宗紀。天寶元年十二月。隴右節度使皇甫惟明。及吐蕃戰於青海。敗之。二年四月。皇甫惟明。克吐蕃洪濟城。四載八月。皇甫惟明。及吐蕃戰於石堡城。副將褚誦死之。是石堡之役。在破洪濟之後二年。傳合爲一事。誤矣。紀云褚誦。而傳云諸葛誦。未知孰是。

回鶻傳

東北俱羅勃爲燭龍州。地理志。燭龍州。貞觀二十二年。析瀚海都督之掘羅勿部置。掘與俱。勿與勃。音相近也。

沙陀傳

王仙芝陷荊襄。朝廷朝發諸州兵討捕。國昌遣劉遷統雲中突騎逐賊。數有功。按國昌以咸通十四年

拒命朝廷遣太原幽州諸軍討之。王仙芝陷荆襄。在乾符四年。其時國昌父子尙未歸命。安得有遣突騎逐賊之事乎。考舊唐書。是年賊陷江陵之郛。楊知溫求援於襄陽。時沙陀軍五百騎在襄陽。軍次荆門。騎軍擊賊。敗之。蓋沙陀軍別有從征襄陽者。非國昌所遣也。

光啓元年。幽州李可舉。鎮州王景崇。按景崇以中和三年卒。子鎔繼之。光啓改元之際。鎮州帥乃王鎔。非景崇也。

南蠻傳

元和中。辰渝蠻酋張伯靖聚衆叛。黔中經略使崔能。荆南節度使嚴綬。湖南觀察使柳公綽討之。三歲不能定。按本紀。同時討伯靖者。尙有劍南東川節度使潘孟陽。傳失載。

姦臣傳

李義府。貞觀中。高士廉、韋挺、岑文本、令狐德棻修氏族志。凡升降天下。允其議。於是州藏副本。以爲長式。時許敬宗以不載武后本望。義府亦恥先世不見敍。更奏刪正。委孔志約、楊仁卿、史元道、呂才等定其書。以仕唐官至五品。皆昇士流。於是兵卒以軍功進者。悉入書限。更號姓氏錄。搢紳共嗤。斬之。號曰勳格。義府奏悉收前志燒絕之。此事已見士廉傳。

贈義府揚州大都督。唐會要。諡曰成。

盧杞。詔拜饒州刺史。給事中袁高當行詔書。不肯草白。宰相曰。杞反易天常。使萬乘播遷。幸赦不誅。又委大州。失天下望。宰相不悅。乃召它舍人作制。高固執不得下。此事已見高傳。雖應兩見。不必又述其語也。

崔昭緯。以戶部侍郎、同中書門下平章事。居位凡八年。按宰相表及本紀。昭緯以大順二年辛亥正月拜相。至乾寧二年乙卯八月罷爲右僕射。居位實不滿五年。

叛臣傳

僕固懷恩。以僕骨歌濫拔延爲右武衛大將軍金微都督。訛爲僕固氏。生乙李啜。乙李啜生懷恩。回鶻傳。以懷恩爲歌濫拔延之子。誤。

逆臣傳

黃巢。仙芝乃遣蔡溫球、楚彥威、尙君長來降。舊書僖宗紀。作蔡溫玉。
進寇廣州。詒節度使李迢書。求表爲天平節度。舊書僖宗紀。稱廣南節度使李巖。

修唐書史臣表

<p>慶曆四年 <small>甲申</small> 樞密使賈昌朝建議修唐書。 令館職日供唐書所未載者 二事附於本傳。</p>	<p>提舉官</p>
<p>五年 <small>乙酉</small> 五月四日詔開局修唐書。</p>	<p>刊修官</p>
<p>賈昌朝 <small>五月以工部侍郎平章事兼樞密使充提舉官。</small></p>	<p>編修官</p>
<p>王堯臣 <small>五月以翰林學士同刊修。</small> 宋祁 <small>五月以翰林侍讀學士、龍圖閣直學士、右諫議大夫同刊修。</small> 張方平 <small>五月以翰林學士同刊修。</small> 楊察 <small>五月以知制誥同刊修。</small></p>	<p>曾公亮 <small>五月以度支員外郎集賢校理、天章閣侍講充以編敕不入局。</small> 趙師民 <small>五月以宗正丞崇文院檢討兼天章閣侍講充未到局。</small> 何中立 <small>五月以殿中丞集賢校理充除開封幕亦</small></p>

六年 丙戌

昌朝

趙槩 五月以知制誥同刊修尋請守蘇州不入局

余靖 五月以知制誥史館修撰同刊修尋出知吉州

按趙宗二人長編不載據春明退朝錄

堯臣 正月除承旨兼端明殿學士充羣牧使

祁

方平 正月以右諫議大夫權御史中丞十一月復為

不入局

范鎮 五月以大理寺丞館閣校勘充

邵必 五月以大理寺丞國子監直講充以目疾辭不到局

宋敏求 五月以校書郎充九月復館閣校勘按

東都事畧謂宋祁范鎮在局一十七年敏求十年今據長編敏求與鎮並命中間未除外任似不止十年也

鎮

敏求

王疇 以太常博士充按東都事畧稱疇在局一十

翰林學士

察 正月。自右正言知制誥。遷翰林學士。

五年。知當於是年入局也。

七年 丁亥。

昌朝 三月。罷相。判大名府。

堯臣 丁母憂。未詳年月。

鎮

丁度 六月。以工部侍郎參知政事。充提舉官。

方平

疇 加直祕閣。按事略云。慶厯中。未詳年月。

方平

敏求

察 四月。以右諫議大夫權御史中丞。

八年 戊子。

度 四月。罷政事。以觀文殿學士判尚書都省。提舉如故。

禠 六月。復以右諫議大夫史館修撰。除翰林學士。六月。出知許州。

鎮

疇

方平 八月。出知滁州。

敏求

皇祐元年 己丑

度

祔 六月復為翰林學士史館修撰自同刊修為刊修官遂獨秉筆

鎮

疇

敏求

劉義安

以試大理評事趙州推官充

呂夏卿

以江寧尉充按二人未詳入局年月

二年 庚寅

度

祔 九月以明堂恩轉給事中兼龍圖閣學士

鎮

疇

敏求

義安

除試祕書省校書郎

夏卿

除試祕書省校書郎充石州軍事推官右二人除官見胡宿外制

三年 辛卯

四年 壬辰

度

度

祁 三月以集賢殿修撰出知亳州詔就州修唐書自後歷內外任皆以史局自隨

祁 以禮部侍郎改知成德軍

鎮

疇

敏求

義安

夏卿

鎮 加直祕閣

疇

敏求

義安

夏卿

五年 癸巳

至和元年 甲午
七月詔刊修唐書官宋祁編
修官范鎮等速上所修唐書

度 正月卒

劉沆 以工部侍郎參知政事
充提舉官

沆 八月以前官同平章事

祁 正月改知定州

祁 遷端明殿學士吏部侍郎
知益州未詳年月
歐陽修 八月自翰林學士吏
部郎中為刊修官以
宰相劉沆薦也

鎮 除開封府推官未詳年月

疇

敏求

義安

夏卿

鎮 以起居舍人直祕閣徐知
諫院

疇 除開封府推官按事署
云至和中或即代鎮也

敏求

義安 轉著作佐郎未詳年月

夏卿 轉祕書丞未詳年月

二年 乙未

十月歐陽修言唐自武宗以下並無實以傳記別說考證虛實向慮闕畧聞西中省寺留司御史臺及鑾和諸庫有唐朝至五代以來奏牘案簿尙存欲差編修官呂夏卿詣彼檢討從之

嘉祐元年 丙申

沈 六月轉兵部侍郎

沈 十二月罷相出知應天府

王堯臣 以戶部侍郎參知政事充提舉官

祁 六月除翰林侍讀學士出知蔡州七月復留爲學士

祁 二月使北還閏三月判太常寺五月知通進銀臺司

修 八月使契丹

鎮 八月奉使契丹

鎮 八月除戶部員外郎兼侍御史知雜事固辭不受十一月復爲起居舍人充集賢殿修撰

敏求 除三司度知判官未詳年

夏卿 以太常博士充未詳年

義安

敏求

疇

遷開封府判官未詳年月

二年丁酉

堯臣

修 祁

正月，知禮部貢舉，轉右諫議大夫。

堯臣 夏卿 義安

除國子監侍講。

鎮

兼修起居注，未詳年月。

壽

八月，以度支判官、祠部郎中直祕閣使契丹。

敏求

以太常丞集賢校理充同知太常禮儀事，以歐

陽修薦也。

義安

夏卿

堯臣

三年 戊戌

堯臣 八月卒

曾公亮 十月以禮部侍郎參知政事充提舉官

祁

修 六月加龍圖閣學士權知開封府

鎮 三月以起居舍人除知制

疇

敏求

羲安

夏卿

堯臣

鎮 轉禮部郎中未詳年月

疇 除刑部郎中知制誥權判吏部見法帖

敏求

羲安

四年 己亥

公亮

祁

三月以端明殿學士兼翰林侍讀學士吏部侍郎集賢殿修撰除三司使尋加龍圖閣學士知鄭州

修

中 月解開封府事轉給事中

五年 庚子。

六月書成。七月戊戌奏上。司修及修官皆進秩。或加職。仍賜器幣有差。

公亮

以是舉日淺。辭賞典。唯賜銀幣。

祁

轉工部尚書。尋自鄭州召還。除翰林學士承旨。明年五月卒。

修

轉禮部侍郎。

堯臣

十二月進裕祭詩。有詔獎諭。轉都官員外郎。

夏卿

鎮

轉一官。

疇

轉一官。

敕求

轉工部員外郎

羲安

加崇文院檢討。未入謝。卒。

夏卿

加直祕閣。皆以書成推賞也。

堯臣

四月卒。以書成。恩錄其子二人。

大昕按。宋景文公登科入禁林。皆在歐陽公之前。寄祿官亦高於歐陽而進表列銜。歐陽在宋之前者。歐公見掌內制。宋公帶職出守。內任重於外任故也。書成後。范王二人各轉一官。史不言轉何官。依宋制。敍遷格。范官禮部郎中。當轉戶部郎中。王官刑部郎中。當轉兵部郎中也。皇祐二年。明堂恩。范王宋三人亦應轉官。而史無明文。姑闕之。

廿二史考異卷五十七

舊唐書一

高祖紀。按舊史本紀前後繁簡不均。睿宗以前文簡而有法。明皇肅代以後其文漸繁。懿僖昭哀四朝。冗雜滋甚。姑以卷帙論之。自高祖至肅宗八世。百四十五年。爲卷十。合計二百廿七葉。自代宗至哀帝十三世。百四十五年。亦爲卷十。而自十七卷以後。分爲上下。合計五百六十八葉。年代相等。而文且倍又半之。且以高祖創業之君。在位九年。而紀止六千八百十有四言。哀帝政在強臣。在位不盈三載。而紀乃一萬三千有二言。蓋唐初五朝國史。經吳兢、韋述諸人之手。筆削謹嚴。中葉以後。柳芳、令狐峒輩。雖非史才。而敘事尙爲完備。宣懿而後。旣無實錄可稽。史官采訪。意在求多。故卷帙滋繁。而事迹之矛盾益甚也。

儀鳳中追尊宣皇帝。按高宗紀。上元元年八月。追尊宣簡公爲宣皇帝。懿王爲光皇帝。此紀云儀鳳中者。誤也。又開元十年。尊宣皇帝爲獻祖。光皇帝爲懿祖。亦宜見于本紀。而此紀失之。

武德元年。相國府司馬劉文靜爲納言。隋民部尙書蕭瑀。相國府司錄竇威。並爲內史令。此納言即侍中。在內史令即中書令之上。八年。加秦王中書令。齊王元吉侍中。則中書令居侍中上矣。自後中書令常居侍

中之上。五代及宋猶循之。又按本紀之例，宰相除免，皆當書。高祖紀書拜而不書罷，如劉文靜之除名，紀亦失之也。睿宗以前本紀，惟書宰相除免。明皇以後，卿監方鎮亦書矣。興元貞元以後，兩制中丞六尚書亦書矣。又如元和以後，宰相多兼集賢殿宏文館大學士，紀皆不書，而宣宗昭宗哀帝三紀，則具書之。諸臣除授散官勳封例不書，而宣宗昭宗哀帝紀亦書之。諸臣賜紫賜緋例不書，而憲宗穆宗宣宗哀帝紀屢書之。禮部知貢舉例不書，而大中咸通間屢書之。此紀文之所以益於前也。

八年，中書令溫彥博沒于賊。按本傳，彥博時爲中書舍人，非令也。

太宗紀

貞觀五年，太子少師新昌縣公李綱薨。按高祖紀，內史令竇威以宰相而書卒，此紀李綱非宰相而書薨。中書令岑文本、馬周皆見任宰相，卻書卒，蓋唐初侍中、中書令正三品，東宮三少則從二品也。宰相職雖顯貴，猶以官未至二品，不與書薨之例。高宗紀，侍中高季輔、辛茂將、姜恪、張文瓘，中書令閻立本、檢校左相竇德元、武后紀，內史狄仁傑，皆書卒，猶此例也。明皇紀，黃門監盧懷慎、左相牛仙客書卒，而侍中裴光庭獨書薨。太子太保陸象先，官從一品，且前宰相也，而書卒。太子少師韓休，亦前宰相也，而書卒。而太子太師徐國公蕭嵩，以前宰相獨書薨。代宗紀，門下侍郎平章事衛國公杜鴻漸，中書侍郎平章事楊綰，皆書卒。而太子太保邠國公韋見素，以前宰相書薨。德宗紀，中書侍郎平章事崔祐甫，門

下侍郎平章事崔損皆書卒而門下侍郎平章事趙憬獨書薨檢校司徒兼太子太師汧國公李勉以前宰相亦書薨尙書右僕射姚南仲亦書薨則書薨書卒殊無一定之例矣使相惟李光弼郭子儀李晟馬燧以元勳書薨此外方鎮帶宰相銜者皆書卒而德宗紀成德軍節度使檢校太尉中書令王武俊憲宗紀劍南西川節度使檢校太尉中書令韋皋二人獨書薨此亦義例之未當也穆宗以後宰相三公三師使相皆書卒無有書薨者又與前數朝之例互異歐史本紀惟宰相終于位者書薨而餘官皆不書較之前史簡而當矣

高宗紀

貞觀二十三年英國公勳爲尙書左僕射同中書門下三品僕射始帶同中書門下按唐初以三省長官爲宰相尙書令與左右僕射皆二品侍中中書令皆三品論班序當由侍中轉中書令乃遷僕射今勳以僕射同中書門下三品是以上兼下也然自後僕射不帶同中書門下者遂不復與聞政事則宰相惟兩省長官任之而南省不得與尙書謂南省僕射雖居人臣之極地不過備員而已開元中嘗改左右僕射爲左右丞相然雖有相之名卻無相之實也

永徽二年中書令兼檢校吏部尙書蔭縣公高季輔爲侍郎侍郎蓋侍中之譌
三年同州刺史河南郡公褚遂良爲吏部尙書門下三品尙書下脫同中書三字

顯慶三年兼中書令皇太子賓客兼檢校御史大夫河間郡公李義府。上兼字去聲。此欠一階之兼也。

下兼字平聲。此兩職事之兼也。

四年惟郭待封張九齡五人居上第。此別一張九齡。

中宗紀

神龍元年上親祔太祖景皇帝。獻祖光皇帝。世祖元皇帝。按獻祖爲太祖之大父。不應在太祖之下。且獻懿二祖廟號。始上于開元十年。不應中宗世已稱之。又光皇帝廟號懿祖。非獻祖也。禮儀志稱崇祚光皇帝。太祖景皇帝。代祖元皇帝。斯爲得之。

睿宗紀

臨淄王諱。按太宗高宗中宗篇中直書高中睿三宗之名。高祖篇中但書太宗而不名。此紀於明皇名稱諱。於例初未畫一。蓋五朝之史。成於明皇之世。故特稱諱。後來又承其舊文。而不能是正爾。

明皇紀

第三子平王基。明皇本名隆基。而制詞但稱基一字。

開元八年皇太子敏薨。追封懷王。太字衍。

天寶元年改侍中爲左相。中書左右丞相。依舊爲僕射。中書下蓋有脫文。當云中書令爲右相。尙書左

右丞相依舊爲僕射。

十三載廢濟陽郡以所領五縣隸東平郡。按新史地理志是年郡廢以長清隸濟州。當作濟南以盧平陰東

阿陽穀屬東平是改隸東平止四縣矣。舊志云廢濟州盧長清平陰東阿陽穀等五縣並入鄆州。

我開元之有天下也。此史成于石晉史臣之手而論稱我字尹思貞等傳贊尙書亞台京尹方伯我朝

重官云誰稱職李勉等傳贊我宗之英曰皋與勉李抱玉傳贊抱玉抱真我朝良將崔慎由等傳贊漢

代荀陳我朝崔杜文苑傳序爰及我朝挺生賢俊北狄傳我太宗文皇帝安祿山傳論我唐之受命也

此皆沿舊史臣之詞而未及改正者當如順宗紀書史臣韓愈名憲宗紀書史臣蔣係名則於文義無

嫌矣又如錢九隴樊興傳竝云父配沒爲皇家隸人此亦非異代史臣之詞。

肅宗紀

開元十五年正月封忠王改名浚。玄宗紀在十三年三月。

天寶十四載十二月丁未陷東京。丁未當作丁酉。

至德元載詔以子儀爲兵部尙書依前靈州大都督府長史光弼爲戶部尙書兼太原尹北京留守同中

書門下平章事。案郭李二人同時除使相當增竝字於同中書之上。

二載十一月壬申朔十二月丙午十二月戊午朔。按一歲不應有兩十二月以上文十月乙巳朔及次

年正月甲戌朔。前後推校。則十一月當乙亥朔。十二月當甲辰朔。史所紀壬申者。十月之廿八日。非十一月朔也。丙午則十二月三日。戊午則十二月十五日。史文之謬誤如此。

三載正月甲戌朔戊寅。按肅代以後諸帝紀。多有無事而書朔者。蓋本實錄之文。史臣刊削未盡也。

乾元二年。右羽林將軍李抱真爲鄭州刺史。此時抱真未爲刺史。蓋李抱玉也。

上元二年。上不康。本當云不豫。避代宗諱。改豫爲康也。禮儀志。上元年聖躬不康。文宗紀。聖體不康。上不康。

是以宣皇帝。按玄宗諡七字。其末三字曰大明孝。肅宗諡九字。其末三字曰大宣孝。大孝之諡。諸帝所同。故稱玄宗爲明皇。肅宗爲宣皇也。

代宗紀

大厯五年。以京西兵馬使李忠臣爲鳳翔尹。代皇甫溫。按忠臣無徙鎮鳳翔之事。當是李抱玉之譌。然爾時抱玉官位已高。不當云京西兵馬使也。

貶禮部尚書裴士淹爲處州刺史。按德宗卽位。改括州爲處州。避御嫌名。此在代宗朝。當云括州。史臣追改之。而於十二年又有括州字。所謂史駁文也。

七年。以張之清豐店。置清豐縣。按新史地理志。清豐縣。大厯七年。析頓邱昌樂置。以孝子張清豐名。其

時無張縣也。紀誤。

十一年十二月，以涇原節度副使試太常卿張掖郡王段秀實權知河東節度留後，北都留守薛兼訓病故也。按段秀實傳，無權知河東留後事。紀所書誤也。即以本紀證之，十二年正月，書以太鎮北庭涇原節度副使、知節度使事張掖郡王段秀實爲涇州刺史，兼御史大夫，充本州團練使。不云新除河東節度留後也。其三月，書以太原少尹、河東節度行軍司馬、權知河東留後鮑防爲太原尹、御史大夫，充北都留守、河東節度使，則此紀云、權知河東留後者，乃鮑防，非秀實矣。蓋秀實由節度副使除知節度事，鮑防以河東行軍司馬、權知留後，皆十一年十二月事。馬璘薨而以秀實代之，薛兼訓病而以防代之，兩事本不相涉，中有脫文，後人誤連屬之。

十四年，上崩于紫宸之內殿。諸帝之崩，皆書年壽如干，獨代宗紀失之。

德宗紀

貞元三年八月，以給事中王緯爲潤州刺史、江西觀察使。江西當作浙西。

十三年三月，以福建都團練使李若初爲明州刺史、浙東觀察使。浙江東道本治越州，據此文似當時曾移治明州，而新史方鎮表未及之。

順宗紀

建中元年正月丁卯立爲皇太子。按德宗紀大厯十四年十二月乙卯制宣王某可立爲皇太子。此紀云正月丁卯者。彼據宣制之日。此據受冊之日也。丁卯下當有朔字。

貞元二十一年以吏部郎中章執誼爲尙書右丞相同中書門下平章事。此時無左右丞相之官。相字衍。

李師古、劉濟兼檢校司空。張茂昭司徒。新史三公表無茂昭名。蓋檢校司徒也。

穆宗紀

元和十五年恆王房子孫改爲泚王房。恆王當是恆山愍王也。泚王卽愍王之譌。唐人避諱民旁字多改从氏。

敬宗紀

寶厯二年其漢陽、汝川兩縣隸鄂州。汝川當作汝川。

文宗紀

太和四年敕前行郎中知制誥者約滿一周年卽與正授。從諫議大夫知者亦宜準此。前行謂吏兵二曹也。唐中葉以後常以它官知制誥行中書舍人之職。與學士對掌內外制。當時亦呼爲舍人。然必官至前行郎中以上乃得正授舍人。若學士除中書舍人者仍典內制不兼外制也。

開成二年吏部奏長定選格請加置南曹郎中一人別置印一面以新置南曹之印爲文從之。新史百

官志失載此事考裴謂傳代宗居陝謂步懷考功及南曹二印赴行在則南曹之有印久矣

武宗紀

會昌元年制以魏博兵馬留後何重霸檢校工部尙書魏州大都督府長史充天雄軍節度使此時魏博軍未有天雄之額蓋史臣追稱之觀會昌三年討澤潞制詞稱成德軍魏博軍不云天雄軍可證

宣宗紀

會昌六年四月制皇長男溫可封鄆王二男涇可封雅王第三男滋可封蘄王第四男沂可封慶王按靖懷太子漢傳云會同六年封雍王大中六年薨傳不言漢爲第幾子而紀又不書雍王之封及薨事此可疑也又據此紀長男溫次男涇三男滋四男沂以卽位之年封五男澤六男潤以大中元年二月封七男洽八男洑九男汶以五年正月封其次第當不紊而於十一年六月乃書第三男灌封衛王第十一男灑封廣王疑衛王灌非第三子當是第十男之譌也而宣宗諸子傳卻又以衛王灌列于夔王滋之前此又可疑也且列傳及新史宗室表俱云宣宗十一子自鄆王溫至廣王灑正合十一人之數何緣更有靖懷太子漢一人此尤可疑也新紀鄆王溫雍王漢雅王涇夔王滋慶王沂以會昌六年五月封漢王澤以大中二年三月封鄂王潤以五年六月封懷王洽昭王洑康王汶以八年九月封衛王灌以十年九月封廣王灑以十一年八月封與舊紀年月多不合惟增雍王漢一人又於大中六年書

漢之薨。頗與舊傳相應。然新舊傳及新宗室表。皆云宣宗十一子。若并漢數之。乃是十二子。此亦可疑也。新紀作漢。而表傳竝作漢。漢與漢字形相涉。必有一誤矣。新傳失載衛王灌一人。表列灌於雅王涇之後。灌之上既有漢涇兩人。而懿宗又爲長子。則灌行在第四。與舊紀所云第三男者。亦終不合。且灌果年長于滋。沂澤潤諸人。何以受封轉在十年之後。此皆可疑也。兩史表傳。皆作夔王滋。獨此紀作蘄王。疑聲之譌。

懿宗紀

咸通四年四月。敕徐州罷防禦使爲文都。隸兗州。文都蓋支郡之譌。徐州本節度使治所。領泗濠諸州。至是以銀刀等軍驕悍。伏誅。降使額爲防禦。又罷防禦使。改隸兗海節度爲屬州也。

五年二月。以兵部尙書牛叢。檢校兵部尙書兼成都尹。劍南西川節度副大使。知節度事。徐州處置觀察防禦使。按叢爲西川節度使。西川與徐州絕遠。必無兼領徐州之事。徐州上當有脫文。蓋別有一人。除徐州觀察使。轉寫失之爾。

十三年制。追諡宣宗爲元聖。至明成武獻文睿智章仁神聰懿道大孝皇帝。按諸帝之諡。皆具載本紀。

紀首又冠以最後增加之諡。獨宣宗紀祇載初上之諡。紀首亦但書聖文獻武孝皇帝。於史例未合。但高祖太宗受命之君。諡止七字。肅順憲三宗。亦止九字。宣宗德薄於前朝。而驟加至十八字。九廟有靈。

何以自安史臣略而不書非無見也

臣嘗接咸通耆老言恭惠皇帝故事。按舊唐書於石晉開運二年奏上距咸通末年已七十三歲矣。且以晉臣而述唐史當於恭惠上加唐字。

僖宗紀

乾符二年十月以前大同軍及雲朔都防禦營田供軍等使李璿檢校左散騎常侍澧州刺史充天德軍澧州西城中城都防禦使。澧當爲豐字之譌。方鎮表貞元十二年以振武之東中二受降城隸天德軍。此云西城恐是東城之譌也。

光啓三年延昌請權以少府監大廳爲太廟。按禮儀志及殷盈孫傳則此議出於太常博士殷盈孫非鄭延昌所請也。

文德元年二月魏博軍亂逐其帥樂彥禎。彥禎子相州刺史從訓率衆攻魏州牙軍立其小校羅宗弁爲留後。按樂彥禎傳云軍府疑貳彥禎危憤而卒衆推都將趙文珩知留後事從訓自相州領兵至城下。文珩按兵不出衆復害文珩推羅宏信爲帥。羅宏信傳云彥禎子忌牙軍出居於外軍衆廢彥禎推趙文珩權主軍州事衆復以爲不便因推宏信爲帥。據此二文則魏軍先立趙文珩後立羅宏信無所謂羅宗弁者。僖昭二紀俱稱羅宗弁誤矣。

昭宗紀

景福二年，乃築第於恆州，迎匡威處之。按穆宗以後，恆州改名鎮州。此卷前後俱稱鎮州，獨是年再見恆州字。

以武威軍防禦使錢鏐。武威當作武勝。

乾寧四年九月，制以鎮海軍節度使錢鏐爲鎮海軍節度，浙江東西道觀察處置等使，杭州越州刺史，上柱國吳王。是時錢鏐自鎮海軍節度兼領鎮海鎮東兩鎮，鎮海軍治杭州，領浙江西道，鎮東軍治越州，領浙江東道。紀於下鎮海之下，不書鎮東者，脫文也。鏐以是年八月四日賜鐵券，其結銜已稱鎮海鎮東等軍節度，浙江東西等道觀察處置營田招討等使，兼兩浙鹽鐵制置發運等使，開府儀同三司，檢校太尉，兼中書令使，持節潤越等州諸軍事，潤越等州刺史，上柱國，彭城郡王，食邑五千戶，食實封壹伯戶，則鏐除兩鎮節度，蓋在八月以前。九月朔所命，乃由彭城郡王進封吳王也。

哀帝紀

中興之初，方備禮改卜。後唐本出沙陀，自國昌賜姓李氏，附鄭王房，及莊宗滅梁，自謂中興唐祚，故有中興之稱。盧簡求傳，中興嗣業，子文紀，仕至尙書中書侍郎平章事。豆盧瑑傳，瑑子革，中興位亦至宰輔。趙隱傳，中興用爲宰輔。王鎔傳，及唐室中興，去僞尙書令之號。崔彘傳，子居儉，中興終戶部尙書。

廿二史考異卷五十八

舊唐書二

禮儀志二

穎客釋例亦云。客當作容。

司禮博士壁閭仁諧。壁當作辟。諧當作譖。

詔將作大匠康譽素往東都毀之。新史牛仙客傳高力士言仙客本胥史非宰相器。帝忿然曰。朕且用康譽。蓋卽此人。此云譽素而彼單名譽。疑彼傳誤。

禮儀志四

詔史記古今人表。玄元皇帝昇入上聖。漢書有古今人表。此詔云史記者。詞臣之不學也。老子本在第四等。今升入第一等。

禮儀志五

修奉使宰相鄭延昌具議。案延昌以昭宗景福元年三月拜相。而修奉太廟之役。乃在僖宗光啓三年。其時延昌未爲宰相也。僖宗紀殷盈孫傳。乃此志皆稱宰相。蓋史家追稱之。

遂以三太后祔禘太廟。達禮者譏其大謬。至今未正。案舊史成于石晉之世。唐之太廟久廢矣。至今未正之語。蓋後唐史臣之詞也。又案舊志十二門。惟禮儀志頗及僖昭兩朝。音樂志亦載昭宗朝一事。五行志有大順二年一條。其餘所載。俱止於宣宗朝。咸通以後。則略而不書。

音樂志一

皇帝受朝。奏政和。此祖孝孫所定十二和之名也。新志則云。正和皇后受冊。以行。與此異。考開元禮。朝賀儀無奏政和之文。惟皇后受冊儀云。典樂舉麾。奏正和之樂。則此志誤也。冊府元龜載。後漢張昭。改十二和爲十二成。議云。皇帝受朝。皇后入宮。奏正和。請改爲展成。然則皇帝受朝下。當有皇后入宮四字。此志脫去。又譌正爲政耳。

穆宗廟樂。請奏和寧之舞。敬宗廟樂。請奏大鈞之舞。文宗廟樂。請奏文成之舞。武宗廟樂。請奏大定之舞。案憲宗以前廟樂。俱載奏請之年。此穆宗四廟樂獨闕之。宣宗以後。并樂舞名。史家亦失之矣。

音樂志二

齊隆昌時。女巫之子曰楊旻。旻隨母入內。及長。爲后所寵。南史作楊珉之。

童謠云。楊婆兒。共戲來。而歌語譌。遂成楊伴兒。案南史。何潤爲文惠太子作楊畔歌。辭甚側麗。袁廓之諫曰。夫楊畔者。既非典雅。而聲甚哀思。殿下當降意。蕭韶。奈何聽亡國之響。楊畔。卽楊伴也。文惠太子

時已有此歌則其來久矣。謂始于隆昌時者，後人附會之詞也。

謂之坎侯聲，譌爲箜篌。坎，空聲相近，故坎亦訓空。後人又加竹於空侯字。

音樂志三

懿宗孝敬皇帝室，懿當作義。

明慶中，皇后親蠶。明慶，卽顯慶也。唐人避中宗諱，易顯爲明。舊史俱改從本號。惟此志及職官刑法志。

三見明慶字。柳奭傳亦有明慶三年之文。

五行志

今朝廷怪異，雖則多矣，然皆仰知陛下天光。此語不可解，當有舛譌。據新史宋務光傳云：今朝廷賢佐雖多，然莫能仰陛下清光，蓋用暈錯之語也。

地理志一

又於邊境置節度，經略使。凡節度使十，經略守捉使三。此所述者開元之制，而職官志云：天寶中緣邊禦戎之地，置八節度使，似乎互。考安西北庭二鎮，天寶中嘗合爲一，而嶺南則至德已前，初無節度之名，或云十節度，或云八節度。志家各據所見言之耳。杜氏通典州郡篇稱節度使十，職官篇稱開元中凡八節度，其云磧西者，卽安西，而不別出北庭之名。舊史蓋本於此。唐六典：凡天下節度使有八，一朔方，二河東，三幽州，四河朔，五

隴右六劍南七嶺西八嶺南蓋并平盧幽州爲一嶺西北庭爲一也。

要衝大郡皆有節度之類。寇盜稍息，則易以觀察之號。案乾元已後，節度使皆兼管內觀察處置使，或不置節度，則觀察使亦帶團練防禦之職。觀察治民事，節度防禦團練皆治軍事，惟權任有輕重耳。非易節度爲觀察也。

東都畿汝防禦觀察使。自東都畿至安南，凡四十四鎮。蓋據大和中方鎮言之。元和二年，李吉甫撰國

計簿云：總計天下方鎮，凡四十八。開成元年，王彥威進所撰供軍圖略云：至德乾元之後，迄于貞元元和之際，天下有觀察者十，節度二十有九，防禦者四，經略者三。據此志，凡三十二節度。七觀察。東都畿

嶺南西道帶經略三防禦二經略也。

乾符之後，天下亂離，禮樂征伐，不自朝廷。禹迹九州，瓜分櫛剖，或併或析，不可備書。據此文，則僖昭以後州縣更改，例不當書於志矣。而天祐初，改陝州爲興德府，乾符元年，更魯城縣曰乾符。景福元年，復於弓高置景州。天祐五年，移州治於東光縣。景福二年，於無極縣置祁州。龍紀元年，以樓煩監牧地置憲州，仍復書之。此義例之未盡一也。

隋京兆郡領大興、長安、新豐、南鄭、華陰、藍田、鄠、盩厔、始平、武功、上宜、醴泉、涇陽、雲陽、三原、宜君、同官、華原、富平、萬年、高陵、二十二縣。案隋京兆郡無南鄭縣。南上當有渭字。渭南一縣，鄭又一縣，合之方盈二

十二之數。又華州篇云。義寧元年。割京兆之鄭縣華陰。置華山郡。卽華州。此亦失書。

改雍州爲鳳翔縣。州字衍。

其年改爲新秦郡。秦當作秦。下文新秦同。

領洛鄭熊穀嵩管伊汝管九州。此兩管字必有一誤。

絳州之恆縣來屬。恆當作垣。下同。

領浚儀新里開封封邱等五縣。此脫一縣。

管豫道真興息舒五州。真字疑衍。

七年改爲都督府廢興道舒息四州。以下文考之道舒息三州皆廢於貞觀元年。非武德七年也。

濟州領盧平陰長清東阿陽穀范八縣。八當作六。

天寶元年改爲河陽郡。乾元元年復爲濟州。十三載六月一日廢濟州盧長清平陰東阿陽穀等五縣。並

入鄆州。河陽當爲濟陽字之譌也。乾元紀元止于三年。此云十三載者。蓋天寶之十三載也。且天寶

中已罷濟陽郡矣。何緣乾元初復爲濟州乎。此差謬之顯然者。

武德四年置海州總管府。領漣環東楚四州。四州者併海州言之。漣上當有海字。考楚州篇云。武德四

年於山陽縣置東楚州。盱眙縣置西楚州。又置總管於西楚州。管東楚西楚。此又以東楚爲海州總管

府所領似自相矛盾矣。

領胸山、龍沮、新樂、曲陽、洙陽、原邱、懷仁、利城、祝其九縣。原邱當爲厚邱之譌。

六年改新樂爲祝其。案新樂、祝其皆在海州所領九縣之數。今改新樂爲祝其。則祝其必先廢矣。而志

卻失書。

廢環州及龍沮、祝其、曲陽、麋邱、利城六縣。麋邱亦厚邱之譌。六當作五。

洙陽、漢麋邱縣。麋當作厚。

泗水、漢下縣。下當作卞。

於下縣古城置泗水縣。下當作卞。

符離、漢縣。隋治朝解城。貞觀元年移治行邑城。行邑當作竹邑。

新泰、漢東新泰縣。晉去東字。案漢志無東新泰縣。魏收志新泰魏置。晉屬泰山。則此縣曹魏所置也。

臨濟、漢之管縣。管當作菅。

領益都、臨胸、臨淄、般陽。般陽疑是般陽之譌。下同。

益都、漢陽。在今壽光縣南十里。故益都城是也。北齊移入青州城北門外爲治所。案漢志無益都縣。蓋

曹魏所置。今移治青州城。卽東陽城也。

厭次漢當平縣。當平蓋富平之譌。

地理志二

襄陵。後魏擒盛縣。本擒昌縣。此改昌爲盛。蓋史臣避後唐廟諱。

平遙。漢平陶縣。後魏廟諱。改陶爲遙。案魏世祖諱燾。與陶同音。故改平陶爲平遙。屢陶爲屢遙。魏收志不言改名之由。當依此志補之。

太谷。武德三年置太原州。原字衍。

六年。州廢。以太谷。邪屬并州。邪當作卻。

五臺。漢慮虎。虎當作虬。

貞觀十五年。楊鉢爲監牧使。貞觀新志作貞元。此誤。

臨清。漢清泉縣。後魏改爲臨清。清泉本清淵。唐人避諱。改考魏收志。清淵。臨清二縣。並屬陽平郡。則非

改清淵爲臨清矣。或太和之世。分清淵置臨清。後來省清淵入臨清耳。

隋於漢南蠻故城。蠻當作緜。

樂城。漢開縣。開當作關。下同。

置陸澤縣於古鄆城。鄆漢縣。鄆當作鄆。

饒安漢平童縣。平童蓋千童之譌。

定州漢縣屬平原郡。漢無定州縣。州治安喜亦非平原郡地。蓋轉寫之譌。

領易涑水永樂遂城道五縣。五年割道縣置北義州。州廢以道來屬。道蓋迺字之譌。

容城漢縣屬涿郡。改爲道縣。道當作迺。下同。

涑水漢道縣。道當作迺。

東城漢東州縣。東當作束。

神龍元年改屬唐興縣。屬當作爲。

檀州後漢奚縣。當云漢儼奚縣。文誤耳。

漢葭萌縣地。屬爲漢壽縣。屬當作蜀。

管鄧浙、酈、苑、溝、新、宏等七州。浙當作浙。苑當作苑。溝未詳。

廢苑州以南陽來屬。苑當作苑。

漢南陽郡以苑爲理所。苑當作苑。

漢南陽郡所治苑縣也。苑當作苑。下同。

新野漢縣屬南陽郡。晉於縣置義州。案晉無義州。必轉寫之譌。

內鄉漢浙縣地。浙當作浙。下同。兩漢志本作析。

領北陽、慈邱、平氏、顯岡四縣。北陽當作比陽。

北陽漢縣屬南陽郡。北陽當作比陽。下同。

北水出縣東。北水亦比水之譌。

方城前漢堵陽縣屬南陽郡。後漢改爲順陽。案順陽前漢爲博山侯國。與堵陽非一地。水經注始誤以

順陽爲堵陽。而唐人因之。

棗陽漢春陵縣屬南郡。當云屬南陽郡。脫陽字。

武德四年置郢州於長壽縣。置京山、藍水二縣屬焉。案京山縣。下云武德四年置温州。領京山、富水二

縣。豈有一京山而隸兩州之理。其必有誤審矣。今以荆州篇前後參校。知武德初温州治京山。郢州所

領之京山當爲章山之譌。且武德四年初置章山縣。本隸基州。七年廢基州。乃以章山屬郢州。此云武

德四年置郢州。卽置章山來屬。亦非也。

又廢郢州。以長壽屬郟州。京山屬荊州。郟當作都。京當作章。

宜城漢郢縣。郢當作郢。

貞觀元年廢郢州。以京山來屬。京當作章。

又省京山入長林。京當作章。

自下牢鎮移治陸抗故壘。新志作步闡壘。

地理志三

揚州置大都督。督越、揚、和、滁、楚、舒、廬、壽七州。越字衍。越州治會稽。與江都遠不相及。非揚州所能督也。

江陵。貞觀十八年分江都置。江陵當作江陽。

晉置秦州。北齊爲秦州。秦當作秦。

楚州。隋江都郡之南陽縣。南陽當作山陽。

慎。漢後道縣。屬九江郡。後道當作浚逾。

管黃蘄亭南四州。南下脫司字。

於孝昌縣置環州。環當作環。

管環應二州。環當作環。下同。

置環州。領孝昌、環陽二縣。環當作環。下同。

宿松。武德四年置嚴州。案是年又於桐廬縣置嚴州。同時有兩嚴州也。

信安。案咸通中更信安縣曰西安。志失書。

盈川如意元年分龍邱置。案元和七年省盈川入信安志失書。

如意元年分桐廬縣之四鄉置盛武縣。盛武新志作武盛。

黟漢縣屬丹陽郡。晉同醫縣。案晉無同醫縣。當是音字之譌。謂黟音近醫耳。縣字衍。

閩漢治縣。治當作治。下文治縣東治縣皆治字。

建安漢治縣地。治當作治。

涇武德三年置猷州。新志武德三年置南徐州尋更名猷州。此失書。置南徐州一節。

廣德漢故漳縣。漳當作鄣。

以犯肅宗諱改爲鍾陵。肅宗當爲代宗。

太和武德五年置南州。南下脫平字。

安福案武德五年於縣置潁州。七年州廢。志失書。

至德至德二年九月中丞宋若思奏置。案池州有至德縣。至德二年析置。而江州又有至德縣。蓋一縣

而重出也。考新志至德縣本析鄱陽秋浦置。鄱陽隸江州。則至德亦當隸江州矣。乾元元年改隸饒州。

永泰元年置池州。始以縣來屬。志于池江二州兩見而不著改隸之由。後人遂疑有兩至德矣。又案唐

時以年號名縣者。雍州之乾封。洛州之登封。涼州之天寶。池州之至德。潤州之上元。楚州之寶應。道州

之大麻滄州之乾符。宋時以年號名縣者。光化軍之乾德。贛州之興國。邠州之淳化。開封府之咸平。祥符。彭州之崇寧。處州之慶元。平江府之嘉定。以年號名府者。紹興。慶元。嘉定。咸淳。以年號名州者。太平。與興國也。

常寧。吳分來陽置新寧縣。來陽當作耒陽。

安鄉。漢潺陵縣地。潺當作孱。下同。

江華。漢馮湏縣。湏當作乘。

召州。隋長沙郡之召陽縣。案。召州。召陽。召陵字。它史皆作邵。獨此志無邑旁。

先天元年。改爲盈川。此別一盈川。楊炯爲盈川令。乃衢州之盈川。非此地。

巫州。大麻五年。改名敘州。志失書。

業州。大麻五年。改名獎州。志失書。

後漢分獠道立南安郡。獠道當作獠道。

龍支。漢允吾縣。允當作允。

後漢改爲龍耆縣。案續漢志。未見改允吾爲龍耆之文。

貞觀五年。置米州及米川縣。十年州廢。縣屬廓州。案新志。州廢。縣隸河州。永徽六年。屬廓州。此志蓋有

脫文也

福祿漢舊縣屬酒泉郡今縣漢樂綰縣地案漢時本名祿福其改為福祿當在晉以後而史無明文樂綰當作樂涇

晉昌漢寘安縣屬燉煌郡寘水名案兩漢志敦煌郡有寘安縣應劭云寘水出北入其澤此寘誤也

地理志四

唐置黨州失起置年月新志永淳元年開古黨洞置

田州失廢置年月疑是開元中置新志開元中置貞元二十一年廢後復置

山州失起置年月天寶元年改為龍池郡此州不見於新唐志愛州之崇平縣武德五年置山州領岡

山真潤古安西安建功新志作建初五縣此別一山州貞觀元年已省入愛州矣

職官志

門下侍郎中書侍郎舊班正四品上大厯二年升此二職已見正三品而正四品上階又列之且志所

列官品乃據永泰元年之品如侍中中書令大厯二年升二品御史大夫會昌二年升三品御史中丞

會昌二年升四品諫議大夫會昌二年升五品皆在永泰以後故志但書其初品獨此二職乃自紊其

例疑後來校書者竄入也

節度使一人。副使一人。行軍司馬一人。判官二人。掌書記一人。參謀無員數。隨軍四人。皆天寶後置。檢討未見品秩。案節度、采訪、觀察、防禦、團練、經略、招討諸使，皆無品秩。故常帶省臺寺監長官銜，以寄官資之崇卑。其僚屬或出朝命，或自辟舉，亦皆差遣無品秩。如使有遷代，則幕僚亦隨而罷。非若刺史縣令之有定員有定品也。此外如元帥、都統、鹽鐵、轉運、延資庫諸使，無不皆然。卽內而翰林學士、弘文集賢史館諸職，亦係差遣無品秩。故常假以它官。有官則有品。官有遷轉，而供職如故也。不特此也。宰相之職，所云平章事者，亦無品秩。自一二品至三四五品官，皆得與開國政。故有同居政地，而品秩懸殊者。罷政則復其本班。蓋平章事亦職而非官也。志謂節度等檢校，未見品秩，似未達于官制。

經籍志

甲部九曰圖緯。以紀六經讖候。十曰經解。以紀六經讖候。十一曰詁訓。以紀六經讖候。案經解、詁訓與圖緯各自爲類。何得蒙上六經讖候之文。考唐六典祕書郎掌四部之圖籍。甲部其類有十。乙部其類十三。景部其類十四。丁部其類三。此志全采其文。惟六典甲部祇有易、書、詩、禮、樂、春秋、孝經、論語、圖緯、小學、十門。其五經異義等部，并入論語類。此志增入經解、詁訓二門，當闕其文，而校書者妄益之耳。

長春秋義記一百卷。梁簡文撰。春字衍。

晉陽春秋二十二卷。鄧粲撰。春字衍。

崇安記二卷。周祇撰。又十卷。王韶之撰。崇安本是隆安。晉安帝年號也。母暝撰錄。在開元中。避明皇諱。改隆爲崇。

帝王代記十卷。皇甫謐撰。代本世字。避諱改。郭邠魏晉代語。何集續帝王代記。虞茂代集。鄭代翼集。皆以代爲也。

晉崇寧起居注十卷。崇寧當爲崇安。卽隆安也。隆安紀元。在寧康太元之後。元興義熙之前。此下又有

晉崇安元興大享詔八卷。可證崇寧爲崇安之譌。

四人月令一卷。崔寔撰。此與賈思勰齊人要術。皆避諱改民爲人也。

江智泉集十卷。本名智淵。避諱改。

邱泉之集六卷。本名淵之。避諱改。

凡七萬餘卷。蓋佛老之書。計於其閒。謂梁元帝江陵所收書。并佛老二家計之。得七萬餘卷也。

食貨志

水部郎中姜行本。請于隴州開五節堰。引水通運。許之。行本傳不載此事。亦不云爲水部郎中。是其闕漏。

王播奏。商人于戶部。度支。鹽鐵三司。飛錢。謂之便換。三司之名。始見於此。

刑法志

於是太尉趙國公無忌。司空英國公勳。尚書左僕射兼太子少師監修國史燕國公志寧。卻掃編。舊制。宰相官僕射以上。敕尾不書姓。蓋用唐故事也。志寧以僕射不書姓。無忌。勳官三公。又在僕射之上。故亦不書姓。尚書唐紹以下。則皆書姓矣。然上文左僕射于志寧。右僕射張行成。下文左僕射劉仁軌。右僕射戴至德。卻又書姓。此史臣增入。非敕文元本也。

廿二史考異卷五十九

舊唐書三

后妃傳

玄宗楊貴妃。國忠二男咄、暄、妃弟鑑、皆尙公主。案楊國忠傳、暄、尙延和郡主、咄、尙萬春公主、不皆尙

公主也。新史公主傳、不載楊鑑名、蓋亦郡主非公主矣。

楊氏一門、尙二公主、二郡主。二公主、謂錡、尙太華公主、咄、尙萬春公主也。暄、尙延和郡主、鑑、亦尙郡主、

故有二郡主之稱。

虢國男裴徽、尙代宗女延安公主。案公主傳、肅宗女郾國公主、始封延光、下嫁裴徽、此云代宗女者、誤

也。延安、延光、未知孰是。

肅宗張皇后、去盈、尙玄宗女常芬公主。新公主傳、作去奢。

憲宗懿安皇后郭氏、昭愍暴殞。案本紀、史臣論、或稱廟號、或稱諡、元和以後、皆稱諡。憲宗曰章武、穆

宗曰文惠、敬宗曰昭愍、文宗曰昭獻、武宗曰昭肅、宣宗曰獻文、懿宗曰恭惠、僖宗曰恭帝。當云恭定、它傳論

亦多稱諡者、若紀傳敘事之文、則皆稱廟號、惟昭愍之諡、則列傳屢見之、如郭后傳、昭愍暴殞、王后傳、

昭愍崇重母族。郭貴妃傳及昭愍遇盜宮闈變起于休烈傳。昭愍初即位。張又新傳。昭愍初即位。熊望傳。昭愍嬉游之隙。學爲歌詩。事未行而昭愍崩。崔郾傳。昭愍即位。韋處厚傳。昭愍狂恣。屢出畋游。杜元穎傳。昭愍即位。龐嚴傳。昭愍即位。趙宗儒傳。昭愍晏駕。刊本誤李逢吉傳。昭愍即位。裴度傳。昭愍皇帝聞之。嗟惋累日。昭愍愕然省悟。昭愍雖少年。昭愍欲行幸洛陽。李德裕傳。昭愍皇帝。童年纘麻。昭愍遇盜是也。亦有一篇之中互見者。如郭后。韋處厚傳。先稱敬宗。後稱昭愍。李逢吉傳。前後稱敬宗。而中稱昭愍。李德裕傳。前後稱昭愍。而中稱敬宗。推原其故。或係晉代史臣避諱稱諡。後來校書者依例更改。而改之又不盡也。至如蕭俛傳。前稱憲宗。而後云穆宗。乘章武恢復之餘。白居易傳。前後稱憲宗。而中云章武皇帝。李德裕傳。前稱武宗。而後云昭肅棄天下。此類偶一見之。蓋史臣雜采它書。稱謂之間。未及整理也。

旣而宣宗繼統。卽后之諸子也。恩禮愈異于前朝。大中年崩于興慶宮。懿安暴崩。新史以爲宣宗之志。此云恩禮愈異于前朝。又極稱其福壽隆貴。與新史正相刺謬。新史本於宋敏求實錄。實錄又本於裴廷裕東觀奏記。未必可盡信也。

殷嶠傳

貞觀十七年。又與長孫無忌、唐儉、長孫順德、劉弘基、劉政會、柴紹等十七人。俱圖其形于凌煙閣。案長

孫無忌傳云圖畫二十四人尉遲敬德傳亦同此云十七人誤

屈突通傳

力屈而至爲本朝之辱以愧相王案六朝以後丞相封公稱相公封王則稱相王是時高祖以唐王節大丞相故有相王之稱或疑爲代王之譌非也

長孫無忌傳

令圖畫無忌等二十四人於凌煙閣據詔書自趙國公無忌至胡國公秦叔寶數之止二十三人新史秦叔寶傳亦同蓋脫申公高士廉一人士廉傳貞觀十七年詔圖形凌煙閣

王珪傳

崇基孫旭開元初爲左司郎中兼侍御史案酷吏篇已有王旭傳而珪傳末又附見旭事一百六十餘言列傳第五十一卷已有王求禮傳而忠義傳又列之列傳第一百廿一卷已有張仲方傳而張九齡傳末又附出二百六十餘言文苑篇已有蕭穎士傳而韋述傳又附出七十餘言

姚思廉傳

并推究陳事刪益博綜顧野王所修舊史博綜當是傳緯之譌

令狐德棻傳

與侍中陳叔達等受詔撰藝文類聚。案新藝文志此書列歐陽詢名。又注云令狐德棻、袁朗、趙弘智等同修。不及叔達名。

魏史既有魏收、魏彥二家。魏彥當作魏澹。

有詔改撰晉書。房玄齡奏德棻令預修撰。當時同修一十八人。新志云房玄齡、褚遂良、許敬宗、來濟、陸元仕、劉子翼、令狐德棻、李義府、薛元超、上官儀、崔行功、李淳風、辛邱馭、劉引之、陽仁卿、李延壽、張文恭、敬播、李安期、李懷儼、趙弘智等修。實二十一人。

孔穎達傳

十八年。圖形于凌煙閣。讚曰。道光列第。風傳闕里。精義霞開。揆辭颯起。案穎達不在凌煙功臣之列。且凌煙功臣亦無讚詞。此傳所載者。當是褚亮所撰十八學士圖讚語。誤以爲凌煙閣耳。十八學士讚見于舊史者。惟姚思廉與穎達二人。

蘇世長傳

令於獸門館讀書。獸門卽虎門。避唐諱改。

太宗諸子傳

中興初進封成王。此卷中興字屢見。高祖諸子魯王靈夔、江王元祥篇。亦有中興字。文苑傳劉允濟富

嘉謨篇亦有中興字。皆謂中宗神龍初也。豆盧瑑、趙隱、盧簡求、王鎔傳所云中興。則指後唐莊宗言之。永崇中坐與庶人賢通謀降封零陵王。永崇卽永隆。史臣避明皇諱追改。舊史惟此傳一見。

韋挺傳

以人部侍郎崔仁師爲副使。唐初民部爲六部之一。高宗卽位改爲戶部。避太宗名下一字也。此改民部爲人部。亦史臣追書。段平仲傳云。隋人部尙書。段達六代孫。

柳澤傳

敢有常舞于宮。澤上疏。在睿宗時不當回避恆字。此云常舞于宮。常于游畋。蓋穆宗以後。史臣追改。

傅仁均傳

以三元之法。一百八十去其積歲。武德元年戊寅爲上元之首。案三元甲子之說。始于遁甲九宮。每歲行一宮。九歲而徧。六十歲未復其初。必轉三甲子。而後終九宮之局。仁均旣以武德戊寅爲上元。則隋仁壽四年甲子爲上元矣。今蘇州虎邱寺有五代顯德五年石幢。後題下元甲子。歲在戊午。依檢仁壽四年甲子爲上元。則麟德元年甲子爲中元。開元十二年甲子爲下元。興元元年甲子又爲上元。會昌四年甲子爲中元。天祐元年甲子爲下元。顯德戊午尙在下元篇也。

李淳風傳

并演齊人要術。齊人卽齊民避諱改。

劉仁軌傳

史臣韋述曰。劉仁軌。裴光庭傳末。俱引韋述史論。而後別有總論。馬燧傳末。亦引史臣語。而後別有總論。列傳第九十六卷。則有論無讚。詳播等

裴行儉傳

斬伏念及溫。傳于都市。行儉歎曰。渾濬前事。古今恥之。但恐殺降之後。無復來者。因稱疾不出。此語又

見裴炎傳。

張文收傳

制景雲河清樂。名曰燕樂。奏之管絃。爲樂之首。今元會第一奏者是也。此卷蓋沿韋述所撰唐書之文。故唐紹。徐有功傳。俱稱明皇爲今上。此傳云。今元會第一奏。亦開元史臣之詞也。下卷澤王上金傳。亦有今上字。

高宗諸子傳

高宗八子。二王早世。爲武后所斃者四人。二王早世。謂原王及孝敬皇帝也。章懷太子燕澤許三王。皆爲武后所戕。考肅宗諸子傳。李泌言孝敬皇帝爲太子監國。而仁明孝悌。天后方圖臨朝。乃鴆殺孝敬。

則孝敬亦武后所斃。而本傳不書。未免自相矛盾矣。

裴炎傳

留太子哲守京師。此太子謂中宗也。於史例不當書名。

韋思謙傳

故孔子曰。百姓足。君孰與不足。百姓不足。君孰與足。此有若之言。

王方慶傳

時成均博士吳揚善。禮儀志作揚吾。方慶駁辟閻仁諤告朔之議。已詳禮志。而此傳復敘其事。幾五百言。

敬暉傳

睿宗卽位。追復五王官爵。贈暉秦州都督。諡曰肅愍。案元和三年。追諡張柬之爲文正。桓彥範爲忠烈。敬暉爲正烈。崔玄暉爲文忠。袁恕己爲正烈。舊史五王傳失書。

宋璟傳

時易之兄弟。皆爲列卿。位三品。璟本階六品。在下座。案璟時爲御史中丞。官正四品。而階止六品。故朝位猶在五品之下。易之官麟臺監。昌宗官司僕卿。皆三品職事官。其階亦必三品矣。

以官言之。正當爲卿。若以親故。當爲張五。據璟所言。知唐人詩文稱行第者。皆親故之稱。

張說傳

其先范陽人。代居河東。近又徙家河南之洛陽。此沿碑狀之文。以史例言之。當云河南洛陽人也。

才望兼著。理合襲升考中上。說以特詔襲升。僅得中上考。李渤爲考功員外郎。奏御史大夫李絳。左散

騎常侍張惟素。右散騎常侍李益三人。請賜上下考。則唐時上上考。蓋不恆有矣。

左司郎中楊伯誠。王峻傳。有戶部郎中楊伯誠。禮儀志。有戶部郎中楊伯成。蓋卽一人而字各異。今西

安府學有大智禪師碑陰記。河南少尹陽伯成撰。當據碑爲正。

魏知古傳

尋改紫微令。姚崇深忌憚之。紫微令。崇所居之官也。尋改二字衍。

盧懷慎傳

時南海郡利兼水陸。瓊寶山積。劉巨鱗。彭杲相替爲太守。五府節度。皆坐賊鉅萬而死。案唐會要。至德

二年。賀蘭進明。除嶺南五府經略兼節度使。自此始有節度之號。已前但稱五府經略。自此遂爲定額。

新方鎮表亦云。至德元載。升五府經略討擊使爲嶺南節度使。是天寶已前。初無節度之稱。此傳云開

元已來四年。廣府節度清白者有四。謂宋璟。裴奩。李朝隱及奩。蓋史家追稱之。宋璟傳云。轉廣州都

督仍爲五府經略使。李朝隱傳云兼判廣州事。充嶺南採訪處置使。俱不云節度也。

源乾曜傳

恐代官之咸列。代官謂世官也。避諱改。

張嘉貞傳

令公四俊。苗呂員訓。苗呂員三人。皆舉其姓。不應崔訓獨稱名。蓋本是苗呂崔員。史家不知員讀去聲。乃改崔爲訓。顛倒其文。以協韻耳。

張九齡傳

諡曰文憲。當作文獻。

辛替否傳

往者。和帝之憐悖逆也。悖逆。謂安樂公主也。睿宗追貶爲悖逆庶人。

吳兢傳

遷相州長垣縣子。當云遷相州刺史。不云刺史者。蒙上文也。長垣上當有封字。

高仙芝傳

累勞至四鎮十將諸衛將軍。唐末。藩鎮部下有十將都虞候。據此傳。則十將之名。唐初已有之。段秀實傳以十

將張羽飛
爲招召將

韋堅傳

先是人閒戲唱歌詞云得反丁紇體反董紇那也。紇囊得體歌。案廣韻體蒲本切。集韻部本切。未聞有都

董之音。且都董雙聲。不可以成切。必轉寫之譌也。體从本。其音必與本相近。故轉寫爲寶爾。

楊國忠傳

父珣以國忠貴。贈兵部尙書。兵部當作武部。今扶風縣有珣神道碑。明皇御製。并書題云。贈武部尙書。

可證也。

王琚傳

四哥仁孝同氣。惟有太平。武后生子四人。睿宗居第四。故明皇稱爲四哥。又棣王琰傳云。臣與新婦情義絕者。二年于茲。臣有二孺人。又皆爭長。恐此三人所爲也。惟三哥辯其罪。明皇爲睿宗第三子。故諸子稱爲三哥。然則唐時以哥爲君父之稱矣。

韋見素傳

加朝散大夫。諸傳多不書散官。惟此傳云。加朝散大夫。加銀青光祿大夫。加金紫光祿大夫。歸崇敬傳云。加銀青光祿大夫。加光祿大夫。加特進。令狐楚傳云。自朝議郎。授朝議大夫。牛僧孺傳云。加銀青光

祿大夫。加金紫階。李珣傳。自朝議郎。進階正議大夫。崔鉉傳。加正議大夫。累遷金紫光祿大夫。此亦例之不一也。

天寶五年。案。天寶初改年曰載。此傳書天寶五年。天寶十三年。誤。

李光弼傳

邊命郝玉曰。爾往擊之。玉曰。玉步卒也。當作郝廷玉。脫廷字。此事又見廷玉傳。

臨陣擒其大將徐璜玉。李秦授。周摯。據此似摯已被擒。而下文又云。生擒安太清。周摯。楊希文等。前後不相應。

高適傳

自玄宗還京後。於綿。益二州。各置一節度。案至德二載。置東川節度。治梓州。綿。當爲梓字之譌。

韋元甫傳

韋元甫。案。列傳失書里居者。韋元甫。衛伯玉。閻巨源。孟元陽。郝廷玉。高固。劉栖楚。張宿。熊望。韋貫之。鄭綱。唐衢。李翱。宇文籍。韋辭。烏重裔。李祐。董重質。石雄。韓全義。王播。徐晦。趙宗儒。宋申錫。高釗。王璠。李渤。牛僧儒。朱朴。鄭繁。周利貞。韋表微。許康佐等。以新史證之。則諸人籍貫。非盡無可考也。

嚴武傳

出爲綿州刺史。案房瑄傳武自京兆少尹出爲巴州刺史。

舊相房瑄出爲管內刺史。瑄時爲漢州刺史在成都節度管內。

郭英父傳

先朝隴右節度使左羽林軍將軍知運之季子也。先朝二字可省。

崔寧傳

大厯十四年入朝遷司空平章事兼山陵使尋代喬琳爲御史大夫平章事。寧以西川節度入朝加平章事而未落節鎮。此使相非真相故新史宰輔表不書其遷司空亦是檢校司空非守司空故表亦不書。

楊炎傳

肅宗就加散騎常侍賜號玄靖先生名在逸人傳。案舊史有隱逸傳無逸人傳而隱逸傳亦無楊播名。蓋亦沿舊文而未刊正也。

楊綰傳

故事舍人年深者謂之閣老公廨雜料歸閣老者五之四。案綰以起居舍人知制誥卽行中書舍人事。其後累遷司勳員外郎職方郎中仍知制誥至是正授舍人故以久次得稱閣老也給事中久次者亦

稱閣老。杜甫集稱嚴武爲嚴八閣老。又有留別賈嚴二閣老詩。賈至爲中書舍人。嚴武爲給事中。

崔祐甫傳

祖暉。懷州長史。父沔。黃門侍郎。諡曰孝公。沔在孝友傳。彼傳云爲中書侍郎。終太子賓客。不云爲黃門侍郎。又不及其諡。彼傳云沔父體。庫部員外郎。汝州長史。此傳云名暉。官懷州長史。皆互異。考新書世系表。沔父皓。安平公。非暉亦非體也。暉官徐州司馬。非懷州長史。其官汝州長史者。名暉。不名體。與二傳又相抵牾。

崔植傳

祐甫弟。廬江令。嬰甫子。上文云祐甫無子。遺命猶子植爲嗣。則祐甫與嬰甫當是親兄弟矣。據世系表。祐甫乃皓之孫。沔之子。嬰甫則暉之孫。滂之子。是祐甫嬰甫爲小功昆弟。疑表有誤也。

裴胄傳

其先河東聞喜人。今代葬河南。以史例當云河南人。裴諤傳云河南洛陽人。是其例也。

伯父寬。戶部尚書。有名于開元天寶間。此語又見裴諤傳。諤爲寬子。當刪此存彼。彼云禮部尚書。此云戶部。亦當從彼傳也。且列傳第五十卷已有寬傳。若以諤、胄二人附見篇末。則文省而當矣。寬傳不及諤、胄名。蓋史局人多彼此失于檢照也。